

## Pauruusoono aa nnaagiai yanaa aavaa Koridii varuuyani reeravai

*Pauruuso kava nnaagiai yanaa aavaa Koridii varuu gioonna kiaapuuyani reeravai. Aa yanaa aavaa Pauruuso roo suaivaki ivo tooduu gioonna kiaapu vaa ausa hanigiooya Koridii varuuyaki kaayau mmuaararoovo vairavai. Gioonna kiaapu vaa ausa hanigiooyakidiri vooyaano Pauruusaara ooqoo tiravai. Innara ooqoo tuduaata Pauruuso pinaama iyara mmuduuya ruoo iyaata mmuaausa tinnivai varaanaraivaarayaata utiravai. Nnaagiai iya mmuaausa tinnivai varooduu rikioo inna ausaivo kaayauma yoketairavai.*

<sup>1</sup> Na Pauruusoono aa yanaa aavaa ngiiini fafaarakiaunoo. Anutuuqoono ari yaata utiivaugiaataama ni mmataama kiaikiai na Yisuu Kirisiinna kuaivaa varee nuaira aposoro vaidivai variaunoo. Ti seena vaidi Timotiiva ni tasipama varikiai na aa kua aavaa ngiiini fafaarakiaunoo. Ngia vaa ausa hanigieera gioonna kiaapu Koridii variaiyaniaatama Anutuuqaa gioonna kiaapu Akaiya mmata mmuakiaavau variaiyaniaatama na aa yanaa aavaa fafaarakiaunoo.

<sup>2</sup> Ti Napoova Anutuuqoota ti Udaanga Yisuu Kirisiivaatama kati ngiiiyara yoketaama yaata utida ngiari ausa nuufaivaitana ngii mida nnaasu variateeraivaara ta yaata utuaunnanoo.

*Pauruuso Anutuuqaata kua yoketaivaa tiravai*

<sup>3</sup> Ti Udaanga Yisuu Kirisiinna Koonna Anutuuqaara ta kua yoketaivaa kiaunnanoo. Ivo ti Napoova tiiyara boo tioo ti tasipama varioo tirooma varira ausa nuufaivaa vareera aataruuvaa mmiraivovee. <sup>4</sup> Mmuuararai aataru ari vookara ari vookaraiyuvo tiiki vaikio ivo ti tasipama yoketaama varioo tirooma varira ausa nuufaivaa vareera aataruuvaa ti mmivai. Ivo itaama ti tasipama varioo tiiyara boo tiineema ti seena gioonna kiaapuuyaki mmuaararaivo vainai rikiada ta iya tasipama yoketaama varida tirooma varira ausa nuufaivaa vareera aataruuvaa iya vitaakiateeraivaara Anutuuqo itaama ti tasipama yoketaama varioo tirooma varira ausa nuufaivaa vareera aataruuvaa ti mmivai. <sup>5</sup> Yisuu Kirisiiva mmamma nniitaroovaa varoovaa roosiima teetaata mmamma nniitareeraivaa varaunnavai. Mmuikaraama Yisuu Kirisiiva tiiki variivaara ivo tirooma varira ausa nuufaivaa vareera aataruuvaa ti mmiivo fai vooyasiaatama kuanaravai. <sup>6</sup> Mo fai ta ngiiyara mmooriivaa varada mmamma nniitaraivaa varaaraivo fai hama ta kuminayaa varaaravai. Anutuuqo ngii tasipama varioo tirooma varira ausa nuufaivaa vareera aataruuvaa ngii mmioo ngii vitoo yoketaivau ngii yapaanaraivaara fai ta mmamma nniitaraivaa varaaravai. Mo fai Anutuuqo ti tasipama varioo tirooma varira ausa nuufaivaa vareera aataruuvaa ti mminaraivo fai hama kuminayaa vainaravai. Ta mmamma nniitaraivaa varadaata yaagueeqama variaunnaneema ngieetama mmamma nniitaraivaa varada yaagueeqama varikiai ta ngii tasipama varida boo tira

kuaivaa ngiiita kua kiaaraivaara Anutuuqo ti tasipama varioo tirooma varira ausa nuufaivaa vareera aataruuvaa <sup>ti</sup> mminaraivo hama kuminayaa vainaravai. <sup>7</sup> Ta ngiiiyara mmannammanna faannaida varida kiaunnanoo: Fai iya yaagueeqama variaaravee, kiaa kiada hama pikieeraida mmannammanna ivaara nnaasu yaata utu kiada variaunnanoo. Vaa ta rikiaunnavai. Ta mmamma nniitaraivaa varaunnaneema ngieetama varaivaara Anutuuqo ti tasipama varioo tirooma varira ausa nuufaivaa vareera aataruuvaa <sup>ti</sup> mmiivaa ngieetama varaaravai.

<sup>8</sup> Ti seenayaso, ta Asiaa mmataivau variaanna suaivaki ta mmuaararoovaa varaannaivaara ta ngii giae ngii mikiae rikiaatee. Kaayau mmuaararoo pinaa ari vookaraauvo tiiki vauduu hama yopeema ta ivaa yaataraaraivaara ta yaata utida ta tete variaanna suaiyauvo taikaanaravaivee kiaa kiada variravai. <sup>9</sup> Ta yaata utida rikiaannaduu Anutuuqo tuuvaugiaataama tete variaanna suaiyauvo kutaa taikaivaiivee kiaa kiada pinaama <sup>ti</sup> mmuaararooduu variravai. Hama ta titi yaagueeqaivaura mmoori vareerama kiada Anutuuqo tinai vaidi putuaiya diitaaraivaa yaagueeqaivaura ta mmoori varaaraivaara ta itaama variravai. <sup>10</sup> Ta putuaara iikiaannaivakidiri Anutuuqo ti vitoo yoketaivau <sup>ti</sup> yapeeravai. Fai yapooma ivo <sup>ti</sup> vitoo yoketaivau <sup>ti</sup> yapaanaravai. Vaa ta ivaara yaagueeqama kiaunnanoo: Fai ivo kava <sup>ti</sup> vitaanaravaivee, kiaa kiada faannaida variaunnanoo. <sup>11</sup> Ngieetama tiiyara yaaku varada <sup>ti</sup> tasipama iikio fai itaama vai aataruuvoo

vainaravai. Fai kaayau gioonna kiaapuuya tiiyara yaaku varaaraivaa Anutuuqo rikioo irisaivaa tiiyara yoketainai fai ta yoketaama varida mmoori varaaravai. Kaayau gioonna kiaapuuya tiiyara kua yoketaivaa Anutuuqaa kiaa mmiateeraivaara ngieetama tiiyara yaaku varada variatee.

*Pauruuso Koridiyyasi kuanaree kiaa rikoo pikieeravai*

12 Aa na tinara kua aavaa inna titiyyara mannaka tinara kuavai. Aa mmata aavau ta varida iikiaunna aataru mmooriyyauvaara ti yaata utiraivoono ausa yoketaivaa ti mmivai. Ta ngii tasipama varida hama ta mmatayaiya tinni vairaiyauvunudiri mmooriivaa iiravai. Ta Anutuuqo tiyyara yoketaama yaata utiraivaugiataama yaagueeqaivaa varada ti ausa mmuduuyaiyuvo ngiiyara yoketaudu Anutuuqo ti kiaa ti mmuuvaugiataama ta safuma ngiiyara mmooriivaa iiravai. Ivaara ta titiyyara mannaka kiaunnanoo. 13-14 Ta ngiiini yanaiyauvunu fafaarakiaanna kuaiyauvaki ngia kooyaa yaarida arinaima rikoo kuaiyauvaa nnaasu ta fafaarairavai. Ta varida iikiaunna aataru mmooriyyauvaara ngia makee kiisama nnaasu teeda rikiaivaa ngia eeyaaavai arinaima teeda rikiaa taika kiaateeraivaara na faannaina variaunoo. Fai ngia itaikio ti Udaanga Yisuu Kirisiiva ti yaparainara suaivaki ta ngiiyara mannaka kiaaraivaa roosiima ngia mmuaakaraama aikiooma tiyyara mannaka kiaaravai.

**15** Ngia itaa kua kiaaraivaara vaa na rikiauvai. Ivaara na taaraneetu ngiisi vinai ngia taaraneetu yoketaama variateeraivaara na ngiisi kuanara suaivaitana mmatairavai. **16** Na ngiee ngii tee ngii pikiee numa Maketoniaa mmataivau nuaina variee mo kava vara ranee ngiisi viee kava ngii teenai ngia ni tuqinnada ni titakiai na Yutaya mmataivau kuanaraivaara na tauraa mmatairavai. **17** Na itaa kua kiaa kuanaree kiaa rikiee pikiee hama kuaivaara na aruoo kiaa aduoo kiaa tira vaidivai variaunnee? Ai hameetavee. Na kuanara nninara aataruuvaa mmataama kiee mo pikiee hara kiee variauvaura mmatayaa diaa vaidi kumimakaivaa roosiima na mmuai suaivau ee-oo na kuanaravaivee kiaa kiee hama na kuanaravee kiaunnee? Ai hameetavee. **18** Anutuuqo tira kuivaava kua kutaavai nnaasu tiivai. Ivaav roosiima ta kua mmayaayaivaa ngii giao ngii mi-aunna kuivaava hama ta ee-oo tida hamavee kiaa kiada ngii giao ngii miaunnavaivee. **19** Anutuuqaa Mmaapuuvaa Yisuu Kirisiinnara ta Siraaso Tim-otivama innara ngii giao ngii miaannaivo hama ivo taara yaata utuoo ee-oo tioo hamavee tira vaidivai variravai. Ivo ee-oo tioo na iinaravaivee tira vaidivai nnaasu variravai. Aanna makee ivo homo itaavai nnaasu varivai. **20** Nnaaru Anutuuqo kua kiaa teerama kioo kuaivaava kaanaivo innaki vairavai. Ivaaraida ta innara kutaa tua-naavaivee kiaa kiada variaunnanoo. Ta itaa kua kiaunnaivaara Anutuuqaa nnutuovo ngiau aapu vainoo. **21** Yisuu Kirisiiva ngiikiaata tiikiaatama variivaara Anutuuqo ariinoo yaagueeqama ti-iyara mmooriivaa iikiai ta yaagueeqama variaunnanoo. Ivoono ariini ti mmataama kioo **22** ta yoketaama variateeraivaara ti aakiaiyauvaki ari

Mmannasaivaa yapa kiaikio varivai. Variivaara gioonna kiaapuuya teeda kiaanoo: Inna Anutuuqaaniyavee, kiaavai. Ivo tiini teerama kiaikio vai aataruuyauvaa fai yapooma ta varaaraivaara ivo ari Mmannasaivaa ti mmivaivee. Ivo itaama tiiyara iivaara ta hama taara yaata utida variaunnanoo.

<sup>23</sup> Na Anutuuqaa avuuvaudiri kua kutaavai ngii giaa ngii miee ataa kua tinaravee. Ngia Koridii variaiya na vее ngia koonnama variaivaara ngii tino rikioo ngii ausaiyauvo mmuaarareevoo kiaa na hama viravai. <sup>24</sup> Ngia Anutuuqaara kutaavaivee kiaa kiada yaagueeqama variaavai. Ivaara ta kava ngii tikiai ngia ti kuaiyauvaa rikida iikiateeraivaara hama ta mmoori varauunnavai. Ngia yoketaama sirigaida variateeraivaara ta ngii tasipama mmoori varauunnavai.

## 2

<sup>1</sup> Sa ngii ausaiyauvo kava mmuaararakiaiveeraivaara na ngiisi kava kuanaree kiaa kiee iima rikiee pikieeravai. Neneenoo itaama yaata utuee pikieeravai. <sup>2</sup> Mo fai na ngiisi vее kua yaagueeqama ngii tinai ngia ausa mmuaarareera tasipama varikiai fai gioono ni tasipama varioo yamaa kua tinai na sirigaina varinarannee? Fai ngia mmuakiaaya ausa mmuaararada variaaraiya nnaasu ni tasipama variaaravai. <sup>3</sup> Ivaara na tauraa yanaivaa nnaasu fafaara kiaaduu ngiisi viravai. Na ngiisi vinai ngia ni tasipama sirigaida variataama vaikiainnaata ngia ausa mmuaararaivaa ni miaarainnood kiaa na tauraa yanaivaa nnaasu fafaara kiaaduu ngiisi viravai. Vaa na arinaima rikiauvai.

Na sirigaina varinai fai ngieeta mmuakiaaya sirigaida variaaravai. <sup>4</sup> Na ngiini yanaivaa fafaara raa suaivaki ni ausaivo kaayauma mmuaararooduu na pinaama ratee variee ngiiyara yaata utuee yanaivaa reeravai. Hama na ngii ausaiyauvo mmuaararakiaiveeraivaara yanaivaa ngiini reeravai. Na mmuakiaaya ngiiyara pinaama mmuduuya ruauvaa ngia arinaima teeda rikiaateeraivaara na yanaivaa ngiini reeravai.

*Maisa aataru iivaara inna aikioovaivee kiatee*

<sup>5</sup> Vaidi voovoono ngii nuuna aakiaivaki maisa aataruuvaa iinno ausa mmuaararaivaa ngiita niitama ti mmiinnee? Vara hama ti mmiinnee? Vaa kutaa itaama iivo hama ausa mmuaararaivaa ni mivai. Mmuakiaaya ngii mivai. Na tinara: Mmuakiaaya ngii mivaivee, tino rikioo ivo pinaama mmamma maisaivoora na kava yaata utuee kiaunoo: Ivo ngiiikidiri vooya nnaasu ausa mmuaararaivaa mmiivaivee, kiauvai. <sup>6</sup> Ivo itaama uuvaara ngia nuunaida kua yeena rau kiada irisaivaa inna mmuuvaa ngia mmuakiaa vooya ee-oo kiaivo inna aikioovai. <sup>7</sup> Aanna makee sa ivaara yaata utiraida ngii ausa mmuduuyaiyauvaa inna mmida tirooma varira ausa nuufaivaa vareera aataruuvaa innaata vitaakiatee. Ivo pinaama ausa mmuaararaivaa varoo yoketaa aataruuvaa eeyaaara pikieevoo kiaa innara yoketaida itaama iikiatee. <sup>8</sup> Ivaaraina ngia innara mmuduuya ruaivaa kooyaa inna vitaakiateeraivaara na yaagueeqama ngii kiaunoo. <sup>9</sup> Ngia iikiainaaree kiaa na tauraa yanaivaa ngiini reeravai. Ngia ni

kuaivaa eeyaaavai rikiada iikiaarannee? Vara hama iikiaarannee? Na ivaan taanaraivaara yanaivaa raa kiee ngiini kiaaduu viravai. <sup>10</sup> Gioonna kiaapu voovoono maisa aataruuvaa iivaara ngia hama ivaara yaata utiraida ngii ausa mmuduuyaivaa inna mmiaani rikiee neeta hama ivaara yaata utiraina ni ausa mmuduuyaivaa inna mmiauvai. Vara ii vaidi ivo maisa aataruuvaa niiyara iiravainnee? Vara hama niiyara iiravainnee? Hama na ivaara yaata utuauvai. Na kati ni ausa mmuduuyaivaa inna mmiauvai. Ngia yoketaama variateeraivaara na Yisuu Kirisiinna avuuvau itaama iikiauvai. <sup>11</sup> Sataango ti yaatareevoora tiee na Yisuu Kirisiinna avuuvau itaama iikiauvai. Ivo ti iinno taanaraivaara vaa ta teeda rikiaunnavai.

### *Pauruuso Titiinnara pinaama yaata utiravai*

<sup>12</sup> Na vее yoosinna Toruaasaa gioonna kiaapuuya Yisuu Kirisiinna mmayaaya yoketaivaa kiaa mmiaa suaivaki na taaduu vaa Udaanga Anutuuqo na mmoori varaanara aataruuvaa mmuaanaa teerama kieeravai. <sup>13</sup> Na ivaki vее buainana taaduu hama Titiva ni too vauvaara na pinaama ivaara yaata utiravai. Yaata utuaivaara ivaki varuuyara na kua yoketaivaa kiaa kiee ivaki pikiee mmata Maketoniaa ivakira viravai.

### *Yisuu Kirisiiva yaatara kioovaara teeta yaataraaravaivee*

<sup>14</sup> Ta Anutuuqaara kua yoketaivaa kiaunnanoo. Vaidiyya rapiraivaa yaatara kiada nnida kua aayanna tiraivaa roosiima Yisuu Kirisiiva vaa yaatara kioovoono tiiki variivaara teeta

yaataraunnano Anutuuqo mmuakiaa suai ti vitoo kua aayanna tasipama nniivai. Suuda yoketaivo ngieera kuaikiai rikiaeaneema Anutuuqo tikiai ta Yisuu Kirisiinna mmayaayaivaa varada mmuakiaa yoosinnaiyauvaki variaiya kiaa mmiaa rada nookiaunnani rikiaavai. <sup>15</sup> Yisuu Kirisiiva tiiki variivaara suuda yoketaivo viraivaa roosiima Anutuuqo ti taikiai ta variaunnanoo. Anutuuqo gioonna kiaapuuya vitoo yoketaivau yapaanaraiyaata ikia aakiaana kuaara iikiaiyaatama suuda yoketaivo viraivaa roosiima ta iya tasipama varida Yisuu Kirisiinna aataruuvaa iya vitaakiaunnano Anutuuqo taivai. <sup>16</sup> Yisuu Kirisiinna aataruuvaaara ikia aakiaana kuaara iikiaiyaano suudaivaa rikiaavo putiraiyakidiri vira suudaivaa roosiivo kuaikiai rikiada putuaara iikiaavai. Yoketaivau variaara iikiaiyaano rikiaavo yoketai suudaivo kuaikiai rikiada tupatupaa variaara iikiaavai. Mo deeyaano itaama aikiooma mmoori varaarannee? <sup>17</sup> Mo teenoo hama ta vaidi vooya roosiima Anutuuqaa mmooriivaa iikiaunnavai. Iya ngiariiyara yaata utida sikau vararaivaara Anutuuqaa mmooriivaa varaaavai. Anutuuqo ti titovaara ta inna avuvau titi ausaiyauvakidiri safuma mmayaayaivaa tida Yisuu Kirisiinna mmoori vareera vaidiya varida mmooriivaa iikiaunnavai.

### 3

*Anutuuqo karaasa kua yeena rau kioovaara tiravai*

<sup>1</sup> Ta itaa kua kiaunnaivaa ngia rikiakiai ta kava titi mannaka kiaunnannee? Hameetavee. Gioonna kiaapu vooya ngiari mmooriivaaraata ngiari variraivaaraatama vaidi vooya tikiai iyara yanaivau fafaara roovaa varada ngii miaani yaarida teeda rikiaavai. Ta iya roosiima titi mmooriivaaraata titi variraivaaraatama yanaivaa ngii miaarannee? Vara ngieenoo ti mmooriivaaraata ti variraivaaraatama yanaivaa ti mmiaarannee? <sup>2</sup> Hama itaa kiaara aataruovo vainoo. Yanaivau vai kuaivo kooyaa nakaaraivaa variraivaa vitaineema ngia Koridii variaiyangiengieenoo ta yoketaama mmoori vareeraivaata ta yoketaama variraivaatama kooyaa gioonna kiaapuuya vitaakiaanoo. Ngia yanaivau yaarida rikieerayaama ngii aakiaiyauvaki kuaivo vaikiai ngia yoketaama variaani mmuakiaa gioonna kiaapuuya ivaa teeda arinaima ti variraivaa teeda rikiaavai. <sup>3</sup> Ta ngiiyara mmooriivaa varaannaduu ngia Yisuu Kirisiinnasidiri fafaara raa yanaivaa roosiima kooyaa inna aataruuvaa gioonna kiaapuuya vitaakiaavai. Ii yanaa ivaa hama ivo sikau tayapoovaitanau Musiiva roovaitanau fafaara reeravai. Gioonna kiaapuuya aakiaiyauvaki fafaara reeravai. Hama ivo upisi nnooriivo varuu seeraivaadiri ivaa fafaara reeravai. Anutuuqo tupatupaa variraivoono ari Mmannasaivaa gioonna kiaapuuya aakiaiyauvaki yapaivaa gioonna kiaapuuya yanaivau teerayaama iya taavai.

<sup>4</sup> Yisuu Kirisiiva tiiki varikiai ta Anutuuqaara yaagueeqakiaunnaivaara ii kua ivaa itaa kua ki-

aunnanoo. <sup>5</sup> Hama mminnaa voovoono ti aaki-aana vaivoono yaagueeqaivaa ti mmikiai ta ngi-iiyara vai mmooriivaa iikiaunnanoo. Yaagueeqaivo aikiooma ti aakiaana vaivo Anutuuqaa-sidiri tiivai. <sup>6</sup> Ivoono ari yaagueeqaivaa ti mmikiai ta ivo yeena rau kioo kua karaasaivaa gioonna kiaapuuya kiaa mmiaunnanoo. Ivo karaasa yeena rau kioo kua aataruovo hama tauraa Musiiva fafaara roo aataruuyauvaa roosiivai. Mmannasa Yoketaivaa aataruvai. Fai ta Musiiva fafaara roo aataruuyauvaa iidada fanniima kiada putida ikia aakiaana tupatupaa variaaravai. Mmannasa Yoketaivaa aataruuvaa fai iidada putida tupatupaa Anutuuqaa tasipama variaaravai.

<sup>7</sup> Anutuuqo ari mmaanna tuu kuaivaa Musiinna kiaa mmira suaivaki Musiiva sikau tayapoovaitanau fafaara rooduu Anutuuqaa mmeekia ari vookarauvo inna tasipama vairavai. Mmeekiaivo kiisa suaivaa taikaanara iinno rikioo homo Musiinna oori nnikiivaki yaagueeqama toovaara Isarairaa gioonna kiaapuuya hama inna teeda nnaasu vairaida ngiari voopi teeda vairavai. Anutuuqaa mmaanna tuu kua aataruuyauvaa iidada fanniima kiada putida ikia aakiaana variaara aataruovo itaama tuuduu rikioo pinaa mmeekia yoketauvo tasipama tiiravai. <sup>8</sup> Fai Mmannasa Yoketaivaa aataruovo pinaa yoketayoketaa ari vookaraivo tasipama vaivo tauraa aataruuvaa yaataraanaravai. <sup>9</sup> Nnaaru Anutuuqo mmuu aataruuvaa irisai putida ikia aakiaana variaaraivo pinaa yoketaivaa tasipama tiiravai. Safu aataru tupatupaa Anutuuqaa tasipama variraivo pinaa yoketaa tuanaa ari vookaraivai vaivai. <sup>10</sup> Ta

yaata utida kiaunnanoo: Aanna makee yoketai aataruuvoo pinaa ari voookaraama vaivo nnaaru mmeekia kaayau pinaama ruvuaahoovo tuuvaa yaatara kiaikio vaa taikaivaivee, kiaunnavai. <sup>11</sup> Nnaaru mmeekia yoketaivo kiisa suai taikoovo yoketaavai. Makee pinaa yoketaa aataruuvoo tupatupaa vaivo pinaa yoketaa tuanaa ari voookaraivai vaivai.

<sup>12</sup> Ta itaama yoketaama variraivaara faannakiaunnaivaaraida ta hama aatuurama kiada yaagueeqama kiada gioonna kiaapuuya kooyaa mmayaayaivaa kiaa mmiaunnavai. <sup>13-14</sup> Hama ta Musiinna roosiikiaunnavai. Gioonna kiaapu Isarairaiya mmeekiaivo Musiinna oori nnikiivau toovo taikaanara uuvaav teevoo kiaa ivo ari oori nnikiivau buruqa kiisavaadiri rummua apu kieeravai. Gioonna kiaapu Isarairaiya ngiari tinniyyauvo yaagueeqauduu hama kuaivaa rikieeraivaa roosiima variravai. Aanna makee Isarairaiya nnaaru Anutuuqo kua yeena rau kioo fafaaraivo vauvaa yaarida rikiaavo hama iya tinniyyauvo rusitikiai hama arinaima rikiaanoo. Iya tinniyyauvunu buruqa rau kiada variraivaa roosiima variaanoo. Fai gioonna kiaapu voovoono Yisuu Kirisiiva inna tasipama varino fai inna tinniyyaa vai buruqaivo takuasano rikioo arinaima rikiaanaravai. <sup>15</sup> Aanna makee Isarairaiya Musiiva tuu kuaivaa yaaruaavo buruqaivo homo iya tinniyyauvunu rummua apu kioo vainoo. <sup>16</sup> Fai vaidi voovoono ti Udaanga Yisuu Kirisiinnara ausa hanigiano rikioo ari ausa hanigiai aataruuvoono buruqaivaa rabaraanaravai. <sup>17</sup> Na Udaanga Yisuu

Kirisiinnara kiau kuaivo inna Mmannasaivaara na kiau kuavai. Fai inna Mmannasaivo gioonna kiaapu voovaaki varioo inna utii aataruuvaa rukuasaa kino mmamma dummukiara kati yoketaama hara kioo varinaravai. <sup>18</sup> Ta vaa ausa hanigieera mmuakiaaya hama nnaaru buruqaivo iya tinniyyauvunu rummua apuuva roosiima variaunnanoo. Ta pinumaivaa roosiima variaunnanoo. Ti Udaanga Yisuu Kirisiinnani yoketaa ari vookaraivo tiikidiri kooyaa vainoo. Ti Udaanga Yisuu Kirisiinna Mmannasaivoono ti aakiaiyauvaki varioo ti hanigiananai ta kiisama yoketaama varida yapooma Yisuunna roosiima pinaama yoketaama variaaravai.

## 4

*Mmataivaadiri kuu yavaiyauvaa iima kiaiyauvaa*

*roosiiikaunnaiya ta variaunnanoo*

<sup>1</sup> Anutuuqo tiiyara boo tioo kua yeena rau kioo ii kua iyauvaa kiaa mmiateera mmooriivaa ti mmiravai. Ivo ti mmuu mmooriivaa ta iikiaunnano hama ti pirisaikiai pikiaunnavai. <sup>2</sup> Ta hatauma iida mmamma maisaira aataru mmuakiaayauvai pikiaada hama ta unnakua unnakua kiaa kiada mmooriivaa iida hama ta Anutuuqaa kuaivaa unnakua unnakuavaa tasipama tida varida iikiaunnanoo. Ta kua kutaivaa nnaasu kooyaa gioonna kiaapuuya kiaa mmida Anutuuqaa avuuuvau safuuma variaunnanii mmuakiaa gioonna kiaapuuya ta itaama variaunnaivaa teeda ngiari yaata utiraivaki ivaara kutaavaivee kiateeraivaara ta

itaama iikiaunnavai. <sup>3</sup> Ta mmayaaya yoketaivaa gioonna kiaapuuya kiaa kookeema kiada kiaa mmiaunna kuaivo kutaan hataumaki vaitiri. Gioonna kiaapu ikia aakiaana kuaaraiyaano nnaasu ivaara kiaanoo: Hama ta teeda rikiaunnavavee, kiaatirivee. <sup>4</sup> Iya yaata tinniyyauvo upisiyyauvai vaivaara iya mmayaaya yoketaivaara hama kutaavaivee kiaavai. Aa mmata aavaara dira kieeta Sataango iya iikio iya yaata tinniyyauvo upisiivai. Yisuu Kirisiinna oyai ari voorkaraivo vaikio ivo Anutuuqaa roosiima mmuaikaraivai varivai. Inna mmayaaya yoketaivo mmeekiaivaa roosiima taivaa iya teevora kiaa kioo Sataango iya iikio iya yaata tinniyyauvo upisiivai. <sup>5</sup> Hama ta titiyara ngii giao ngii miaunnanoo. Yisuu Kirisiiva ti Udaanga tuanaivaara ta ngii giao ngii miaunnanoo. Ta Yisuu Kirisiinna mmoori vareera vaidiyaanora tida ngiiita ngii mmoori vareera vaidiya varida ngii giao ngii miaunnanoo. <sup>6</sup> Udaanga Anutuuqo tunoo: Fai upisiivakidiri mmeekiaivo taanaravaivee, tuuvoono ari mmeekiaivaa ti aakiaana yapa kiaikio taivai. Yisuu Kirisiinna oori nnikiivaki mmeekiaivo too varinai ta Anutuuqaa oyai ari voorkaraivaa arinaima taaraivaara ivo ari mmeekiaivaa ti aakiaana yapa kiaikio taivai.

<sup>7</sup> Ii aataru yoketaa ivaa ta varaunnaiya vaidiyya mmataivaadiri kuu yavaivaa iima kiaivaa roosiikiaunnaya ta variaunnanoo. Kuu yavaivo kiisa suai nnaasu vainno taikeeraivaa roosiima ta muaraagama variaunnanoo. Hama titi yaagueeqayaara ta mmooriivaa iikiaunnanoo. Anutuuqaa yaagueeqa ari voorkaraivaura ta

mmooriivaa iikiaunnanoo. Ii aataru ivo kooyaa vakiaiveeraivaara ta vaidiiya mmataivaadiri kuu yavaivaa iima kiaivaa roosiima variaunnanoo.

<sup>8</sup> Mmuaararai aataruuya uvo makemakee tiisi nnikiai ta teedaata pikiada variaunnano hama ti yaataraivai. Vo suai vo suai airi airi yaata utiraivo tiiki vaikiainnata hama ta pinaama ivaara yaata utiraida yaagueeqama variaunnanoo. <sup>9</sup> Ti nnammutuaiya koonnai aataruuya uvaalaa ti iikiaavoota ti Napoova hama ti pikiaivai. Vaidiiya ti ruputuaaniaata ta hama putuaunnavai. <sup>10</sup> Yisuu Kirisiinna variraivo tiiki vaivaa iya kooyaa taateeraivaara vaidiiya Yisuunna ruputuduu putuneema ta variaunnani iya ti ruputuaara iira aataruuyo makemakee tiisi vaivai. <sup>11</sup> Ta mmatayaa variaunna suaivaki ta Yisuunna mmooriivaa iikiaunnani gioonna kiaapuuya ivaara ti ruputuaara iikiaaniaata ta mmannammanna mmooriivaa iikiaunnanoo. Ivo tiiki varikiai ta variaunnaivaa ngia kooyaa taateeraivaara ta mmannammanna mmooriivaa iikiaunnanoo. <sup>12</sup> Ii na kiau kua ivaa oyaivo ataama vainoo. Iya ti ruputuaara iikiaani ta mmooriivaa mmannammanna varada putuaara iikiaunnani ngia ivaa teeda ivaudiri tupatupaa variraivaa varada variaanoo.

<sup>13</sup> Anutuuqaa kua fafaaraivo vainno tinoo: Na Anutuuqaara kutaavaivee kiauvaara na kuaivaa kiauvaivee, tiivai. Nnaaruua vaidi voovoono fafaara roo kua voovoono itaama kutaavaivee tuneema teeta Anutuuqaara kutaavaivee kiaunaivaara ta kuaivaa kiaunnavai. <sup>14</sup> Vaa ta rikiaunnavai. Anutuuqo Yisuu Kirisiiva putuuvakidiri

tuduu diitoneema fai ta putuaunnaivakidiri ivo ti tinai ta diitaaravai. Diitakio ivo tiita ngiitama vitoo Yisuuba varii yoosinnaivaki kinai ta inna tasipama variaaravai. <sup>15</sup> Ta ngiiyaroо tida mmuaakiaa mmooriyyauvaa itaama iikiaunnano mmuaararaivo tiisi nniivai. Anutuuqo kati gioonna kiaapuuyara yoketaama yaata utiraivaa fai vooya vooya arinaima rikiada Anutuuqaara kua yoketaivaa tikio inna nnutuuvu ngiau aapu kuanaravai. Kaayauya itaama kiaavovo kua yoketaivo pinaavai innasi vainaravai. Itaama vakiaiveeraivaara ta ngiiyaroо tida mmooriyyauvaa iikiaunnanoo.

*Ta Anutuuqaara kutaavaivee kiaa kiada inna yaagueeqaivaura variaunnanoo*

<sup>16</sup> Ivaara ta rikiaunnano hama ti pikiaataivai. Ti nnabaiyaubo vakia roo vioo vioo yotera ngiaabai kieera mmammaivaa varaikeo rikioo ti aakiaivaki varii vaidi tuanaivo makemakee mmuakiaa suai karaasavai nnaasu varivai. <sup>17</sup> Aa ta makee variaunna suai aavaki kiisa kiisa mmuaaraivo fai taikaanaraivaa ta varaunnavaai. Fai ta ivaa yaatarada yapooma tupatupaa yoketaama ari vookaraama variaaravai. <sup>18</sup> Hama ta aa kooyaa mminnaa aayauvaara yaata utida teeda nnaasu vaida varirama kiada ta hama avu teera mminnaiyauvaara yaata utida teeda nnaasu vaida variaunnaivaara ta tupatupaa yoketaama ari vookaraama variaaravai. Avu teera mminnaa aa kooyaa vai aayauvo fai taikaanaravai. Hama avu teera mminnaiyauvo fai tupatupaa vainaravai.

## 5

<sup>1</sup> Itaama vaivaara vaa ta rikiaunnavai. Ta unnakua nnau heekeeraivaa roosiima ta mmatayaa hara kiada variaunna nnabaiyauvo vaivai. Fai iyauvo tavaratanai Anutuuqo karaasa nnabaiyauvaa nnau karaasaivaa roosiima ariinoo heeka kiaiyauvaki ta hara kiada variaaravai. Ii nnaba iyauvaa ta varada ngiau aapu tupatupaa variaaravaivee. <sup>2</sup> Ti nnau ngiau aapu vaiyauvaa ti varaataikiai ta varaaraivaara yaata utida varida aavau ratada variaunnanoo. <sup>3</sup> Fai yapooma uyira rairaiyauvaa roosiima Anutuuqo ii nnau iyauvaa ti uyu kinai hama ti mmannasaiyauvo kuminaya variaaravai. <sup>4</sup> Aa ta ti nnabaiyauvaki variaunna suai aavaki ta pinaama yaata utida kaayau mmuaararaivaa tasipama variaunnanoo. Itaama varidaata ta ngiau aapu varada variaara nnabaiyauvaa varaaraivaara yaata utida variaunnanoo. Mo hama ta titi nnaba mmatayaa variraiyauvaa pikiaaraivaara ti yoketainoo. Anutuuqo kati ti nnaba karaasaiyauvaa uyira raira roosiima ti uyu kinai ta varada tupatupaa variaaraivaara ti yoketainoo. <sup>5</sup> Ta itaama variaaraivaara Anutuuqoono vaa mmuaanaa ti iima kioo ti teerama kieeravai. Ta itaama yoketaama variaaraivo kutaavai vainoo kiaa kiada ivaara rikiaaraivaara Anutuuqo Mmannasa Yoketaivaa ti mmiravai.

<sup>6</sup> Itaama vaikiai hama ti pikiaataikiai ta mmannammanna yaagueeqama variaunnavai. Vaa ta rikiaunnavai. Ta titi nnabaiyauvaki variaunna suaivaki ta ti Udaanga Yisuu Kirisiiva

variraivaa ngieerama variaunnanoo. <sup>7</sup> Aa suai hama ti avuuvaadiri inna teerama kiada ta kati innara yaagueeqama kutaavaivee kiaa kiada variaunnanoo. <sup>8</sup> Ta mmannammanna yaagueeqama variaunnaiya aa nnaba aayaauvaa pikida ti Udaanga Yisuu Kirisiinna tasipama variaaraivaara ti yoketainoo. <sup>9</sup> Ta aa nnaba aayauvaki variaunnannee? Vara ta iyauvaa pikida inna tasipama variaunnannee? Ta varida mmooriivaa iikio rikioo ivo ti teeno inna yoketaakiaiveeraivaara ta iida varida variaunnanoo. <sup>10</sup> Fai Yisuu Kirisiiva kieeta varira mmaataivau varioo ti yaparainara iinai ta mmuakiaaya inna avuuuvau diaaravai. Ta mmatayaa variaunna suaivaki mmoori yoketaivaata mmoori maisaivaatama iikiaunnaivaara ivo ti yaparainai ta mmuaavai mmuaavai titi mmooriyyauvaa irisaiyauvaa safuuma varaaraivaara ta inna avuuuvau diaaravai. Itaama vaivaara ta mmooriivaa yaagueeqama iikio inna yoketaakiaiveeraivaara iikiaunnavai.

*Yisuuvu putuuvaara ta Anutuuqaa seena tua-naaya variaunnanoo*

<sup>11</sup> Ivaara ti Udaanga Anutuuqaara aatuukiaunnaivaa vaa ta rikiaunnavai. Ta ivaa rikiaunnaivaara iya yoketaama variateeraivaara ta yamaa kua yamaa kua tida gioonna kiaapuuya kiaa mmida variaunnanoo. Vaa ta variaunna aataruuvaa Anutuuqo eeyaavai kooyaa too rikiavai. Ngiingii yaata utiraivaki ngiengieetama na yoketaama variauvaa vaa kooyaa teeda rikiavivee kiauvai. <sup>12</sup> Ta itaa kua tida hama ta titi mannaka kiaunnaivaara kava ngiiita ngii

giaa ngii miaunnanoo. Hameetavee. Ngia ti-iyara mannaka kiaara aataruuvo kooyaa vaki-aiveeraivaara ta itaa kua kiaunnanoo. Vaidi vooyaano ngiari mmooriyyauvaa kooyaa teeda iiraiyauvaa ngiari mannaka kiaavai. Iya aaki-aiyauvaki vaira mmooriyyauvaa hama iya man-naka kiaavai. Fai itaa kiaiyaano ngii tikiad riki-adia ngia tiiyara aikiooma sai kiateeraivaara ta itaama ngii giao ngii miaunnanoo. <sup>13</sup> Iya ti-iyara kiaanoo: Yaata dunnayavee, kiaivo iya inna aikiooma kiaavai. Ta Anutuuqaara mmooriivaa iikiaunnaivaara iya itaa kua kiaivo inna aikiooma kiaavai. Iya ti kiaanoo: Yoketaama yaata utu-aayavee, kiaivo iya inna aikiooma kiaavai. Ta ngi-iiyaroo tida mmoori varauunnaivaara iya itaa kua kiaivo inna aikiooma kiaavai. <sup>14</sup> Yisuu Kirisiiva tiiyara mmuduuya ruaivaara ta innara mmoori varauunnanoo. Vaa ta arinaima rikiaunnavai. Mmuua vaidivoono mmuakiaa gioonna kiaapu-uyara putiravai. Putuduu ivaara mmuakiaaya teetama putiravai. <sup>15</sup> Ngia gioonna kiaapu vaa tu-patupaa variraivaa varaiya sa ngiingiiyara yaata utida variraida ivo ngiiyara putuoo kava putu-uvakidiri diitoovaara yaata utida variatee. Ngia itaama yaata utida innara variateeraivaara ivo mmuakiaaya putiravai.

<sup>16</sup> Ivaara aa suai aavakidiri hama ta mmatayaa diaa gioonna kiaapuya roosiiima mmatayaa diaiya ngiari iikiaa aataruuyauvaa teeda iyara maisayavee tida yoketaayavee kiaaravee. Nnaaru Yisuuba mmatayaa varuu suaivaki ta inna teeda mmuakaraama innara yaata utida itaa kua tiravai. Aanna hama ta kava itaa

kua kiaaravai. <sup>17</sup> Gioonna kiaapu voovoono vaa Yisuu Kirisiinnaki variivoono ivo vaa karaasavai varivai. Ivo tauraa varii aataruuvo taika kiaikio rikioo ivo vaa karaasavai varivai. <sup>18</sup> Ii aataru ivaa Anutuuqoono iivai. Yisuu Kirisiiva putuuvaara hama ta mmannammanna Anutuuqaa nnammutuaaya variaunnanoo. Ta inna seena tuanaaya variaunnanoo. Ti seenaiya homo inna nnammutuaaya variaiyara ta iyara mmooriivaa iikiai iyaatama inna seena tuanaaya variateera mmooriivaa Anutuuqo ti mmivai. <sup>19</sup> Ivo Yisuu Kirisiinnaki varioo gioonna kiaapuuya inna seena tuanaaya variateeraivaara mmooriivaa iinno variravai. Iinno varioo iya mminnamminnaa maisaiyauvaa irisaiyauvaa iya mminaraiyauvaaara hama yaata utuoo variravai. Hama itaama yaata utirainno iya inna seena tuanaaya variateera mmoori aataruvaa ti mmiravai.

<sup>20</sup> Itaama vaikiai ta aanna ngii tasipama varida Yisuu Kirisiivaano ngiiyara ti tikiai ta inna kuaivaa ngii giao ngii miaunnanoo. Anutuuqo ariinoo yamaa kua ngiiita tinaraivo tiikinaadiri ngiiita yamaa kua tiivai. Ngia Anutuuqaa nnammutuaaya variaiya hanigiada inna seena tuanaaya variateeraivaara ta yamaa kua yamaa kua tida ngii giao ngii miaunnanoo. Ta Yisuu Kirisiinna mmooriivaa varada inna yaata utiraivaugiataama yamaa kua yamaa kua tida ngii giao ngii miaunnanoo. <sup>21</sup> Anutuuqo tiiyaroo tioo Yisuu Kirisiiva hama mminnamminnaa maisaatauvaa tuduu ti mminnamminnaa maisaiyauvaa vareeravai. Yisuu Kirisiiva tiiki varino Anutuuqo safuuma variraivaa ti

mminaraivaara inna tuduu ti mminnamminnaa maisaiyauvaa vareeravai.

## 6

<sup>1</sup> Ta Anutuuqaa mmooriivaa inna tasipama iida varida yamaa kua yamaa kua tida ngii giao ngii mida kiaunnanoo: Anutuuqo kati ngiiyara yoketaama yaata utiraivaa vaa ngia varaivaa pilkievoora tida yoketaama haitatuuda tuqinnama variatee, kiaunnanoo. <sup>2</sup> Anutuuqo tii kuaivaa rikiaatee. Ivo tinoo:

Na ngiiyara yoketaavee kiau suaivaki  
na ngii kuaivaa rikiauvai.

Na ngii vita yoketaivau yapau suaivaki  
na ngii tasipama variauvavaivee.

Anutuuqo itaa kua tiivai. Rikiaatee. Anutuuqo tiiyara yoketaavee tii suaivo aanna ii suai ivovee. Ivo iya vita yoketaivau yapaanara tii suaivo aanna ii suai ivovee.

<sup>3</sup> Ta Anutuuqaa mmoori iikiaunna aavaara sa vaidi voovoono too kiaivee: Maisa mmoorivavee, kiaivee. Ta hama ivaudiri vaidi voovoono haruruaveera mmoorivai iikiaunnanoo. <sup>4</sup> Hamavee. Ta Anutuuqaa mmooriivaa varada inna mmoori vareera vaidi tuanaaya variaunnaivaa kooyaa gioonna kiaapuuya vitaakiaunnavaai. Ta mmoori varada variaunnano ari vookara ari vookarai mmoori mmuaararaiyauvo tiisi nnikiai ta hama iyauvaara yaata utiraida rikiadaata mmannammanna yaagueeqararama iida variaunnanoo. Mmamma mmuaararaivoota maisa mmooriivootama tiisi nnikiai ta hama iyauvaara yaata utiraida rikiadaata mmannammanna yaagueeqama

variaunnanoo. <sup>5</sup> Iya ti ripiida oovi nnauvaki ti yapada tiisi nnida ti ututuuma kiada ti koonnakaannama kiada ti ruputiravai. Ti ruputida kaayau mmoori hama ta yopeema iikiaaraiyauvaa ti mmuduu hama ta vuru vaida hama ta yeenna nneeravai. <sup>6</sup> Iya ti itauduaata ta mmannammanna yoketa yoketau mmoori aataruuyaauvaa iida varida ta arinaima teeda rikiaanna tinniivaa varada hama ta makee tuduu ti nnannatooduu ta tirooma yoketaama varida gioonna kiaapuuya tasipama mmoori aataruuyaauvaa ta iida variravai. Ta itaama varida ta Anutuuqaa mmoori vareera vaidi tuanaaya variaunnaivaa ta gioonna kiaapuuya vitairavai. Mmannasa Yoketaivoono ti tasipooduu ta itaama iya vitaida ta kutaa tuanaa iyara mmuduuya rida iya vitairavai. <sup>7</sup> Ta kua kutaivaa tida iya vitaakiaannaduu Anutuuqaa yaagueeqaivo ti tasipooduu ta mmoori varada iya vitairavai. Anutuuqo ti mminnamminnaa maisaiyauvaa vaa ruga kiaikiai ta safuma variaunnaivaara rapira vaidiivo suru okoovaa hiri apu kioo vairaivaa roosiima ta dida vakiaunnanoo. <sup>8</sup> Gioonna kiaapu vooyaano ti mannaka kiaani vooyaano tiiyara maisayavee kiaavai. Vooyaano tiiyara mmoori koonnama iikiaayavee kiaani vooyaano tiiyara kiaanoo: Mmoori yoketaama iikiaayavee, kiaavai. Vooyaano tiiyara yaata utida kiaanoo: Unnakua kiaa kiada kiaayavee, kiaa kiada hama tiiyara yoketaakiaaniaata ta kua kutaivaa kiaunnavai. <sup>9</sup> Mmuakiaa gioonna kiaapuuya vaa ti teeda rikiaiyaata vooyaano kiaanoo: Hama ta teeda rikiaunnavaivee, kiaavai.

Vooyaano maisa mmooriivaa ti mmuduu ta putidada rikiadaata variaannaiya mo aanna ti taatee. Ta homo variaunnanoo. Vooyaano ti ruputuaani hama ta putuaunnavai. <sup>10</sup> Ta ausa mmuaararaivaa tasipama varidaataida mmannammannaa sirigakiaunnanoo. Ta hama mminnaatai vaidiyaano varida Anutuuqaa mmayaaya yoketaivaa kaayau gioonna kiaapuuya kiaa mmiaunnani rikiada yoketaama variaanoo. Ta mmanna haipu vaidiya hama ti mminnaataiyaanooda mmuakiaa mminnaa tuanaiyauvo ngiau aapu vaiyauvaa varaunnanoo. Ta itaama varida Anutuuqaa mmoori vareera vaidi tuanaaya variaunnaivaa kooyaa gioonna kiaapuuya vitaakiaunnanoo.

<sup>11</sup> Ni seena tuanaa Koridii variaiyaso, ta tiiki vai kuaiyauvaa safuuma kooyaa ngii kiaa kookieema kiada ti ausa mmuduuya eeyaavai ngii mmiaunnavai. <sup>12</sup> Ta ti ausa mmuduuya mmira aataruvaa hama puaisa utiraida ta ngii mmiaunnavai. Mo ngeenoo ngiingii ausa mmuduuya mmira aataruvaa puaisa utida hama ti mmiaavai. <sup>13</sup> Ngia ni uru nnaakaraya roosiima variaivaara na ataa kua ngii giae ngii minaravai. Ta ngiiiyara iikiaunneema ngeeta itaama ngiingii ausa mmuduuya eeyaavai ti mmiatee.

*Hama ausa hanigieeraiya sa iya tasipama mmoori varaatee*

<sup>14</sup> Sa vaa ausa hanigieeraiya hama ausa hanigieeraiya tasipama mmooriivaara kua yeena rau kiada mmuaakaraama varaatee. Dataama kioo safuuraivoota tomedairaiivootama mmuaavau nuunainno vainarannee? Hama

yopeemavee. Dataama kioo mmeekiaivoota upisiivootama mmuaavau nuunainno vainarannee? Hama yopeemavee. <sup>15</sup> Dataama kioo Yisuu Kirisiivaata Sataangootama mmuaatinnivai varaarannee? Hama yopeemavee. Dataama kioo vaa ausa hanigieeraivoota hama ausa hanigieeraivootama mmuaatinnivai varaarannee? Hama yopeemavee. <sup>16</sup> Dataama kioo Anutuuqaa nnau pinaivo unnakua anutuuyauvaa tasipama mmuaavau vainarannee? Hama yopeemavee. Hama ngia rikiaannee? Ti aakiaiyauvo Anutuuqo tupatupaa variraivaa nnau yoketaayauvaivee. Ivaara Anutuuqo ataa kua tunoo:

Na iya aakiaana hara kiee variee  
iya tasipama nuainaravee.

Na iya Anutuuqo varinai  
iya ni gioonna kiaapuya variaaravee.

<sup>17</sup> Anutuuqo itaa kua kiaa kioo vo kuavai ataa kua tunoo:

Hama ausa hanigieeraiya ngia iya pikiada  
ari voovau variatee.

Iya iira aataru mmoori mminnaiyauvaa  
na ooqoo tiraiyauvaa  
sa iya tasipama iikiatee.

Ngia itaama iikiai na ngii vitaanaravai.

<sup>18</sup> Fai na ngii Gioova varinai  
ngia ni naunna mmaapuya variaaravee.  
Neenoo mmuakiaa mminnaiyauvaa  
yaataree diraivoono itaa kua kiaunoo.

Anutuuqoono itaa kua tiravai.

## 7

<sup>1</sup> Ni seena na ngiiiyara mmuduuya ruauyaso, ii kua kiaa teerama kioo kua iyauvo tiiyara tivaaraida nnikiai ta mmuakiaa mminnamminnaa maisaiyuvo ti mmammayaa vaiyuvaata ti aakiaana vaiyuvaatama ooqoo tida pikiaaravee. Nnikiai Anutuuqaa kuaivaa rikiada inna mmemmaana vida yoketaama ari vookaraama varira aataruuvaa iida varida yaagueeqa gioonna kiaapu tuanaaya variaaravee.

*Pauruusaa ausaivo kaayauma yoketairavai*

<sup>2</sup> Tiiyara mmuduuya ruatee. Hama ta vaidi voovaara koonnama iikiaunnnavai. Hama ta voovai maisa aataruuvaa iikiaunnano ivo koonnama varivai. Hama ta voovai unnakua unnakua kiaa kiada inna mminnaiyuvaara varaunnavai. <sup>3</sup> Hama na kumina kuaivaa ngiiiki yapaanaraivaara itaa kua kiaunoo. Ta ngiiiyara pinaama mmuduuya ruaunnanoo. Vaa na tauraan gii giao ngii miauvai. Ta ngiiiyara pinaama mmuduuya ruaunnaivaara ngia putikiai teetama ngii tasipama putuaaravai. Ngia varikiai teetama ngii tasipama variaaravai. <sup>4</sup> Na ngiiiyara yaagueeqama yoketaayavee kiaunoo. Ngia yoketaama iikiaivaara na pinaama ngiiiyara mannaka kiaunoo. Pinaa mmuaararaiyo tiiki vaikiainnaata hama na ivaara yaata utiraina ni ausaivo pinaama ari vookaraama yoketaikiai na ngiiiyara pinaama kiee sirigakiaunoo.

<sup>5</sup> Ta numa mmata Maketoniaa ivau varida hama vari hokobairama kiada varida rikiaannaduu airi airi tomeda iira aataruuya uvo ti suvuai kiodduu gioonna kiaapuuya tiita buaaru

tduu ti mmooriyyauvaara ti ausaiyauvo ti mmuaarareeravai. <sup>6</sup> Ti mmuaararooduu too Anutuuqo ausa mmuaarareeraiya tasipoo ausa nuufaivaa iya mmiraivoono ti tasipoo tiiyara boo tioo ti seena ngiaammua voovai Titiinna titooduu tiisi nniravai. <sup>7</sup> Hama ivo numa ti tasipama varuuyaara nnaasu ti yoketairavai. Ngia inna tasipama varuu mmayaaya yoketaivaa ti kiaa ti mmuuuyaaraatama ti yoketairavai. Ngia ni taaraivaara pinaama ratada varuu mmayaayaivaa ti kiaa ti mmioo ngia koonnama variaivaara pinaa ausa mmuaarareera mmayaayaivaatama ti kiaa ti mmioo ngia niiyara mmuduuya rida niiyara vaitutuura kuaivaa tuu mmayaayaivaatama ti kiaa ti mmiravai. Ivaara na rikiaaduu pinaama ni yoketairavai.

<sup>8</sup> Na yanaivaa fafaarama ngii miaaduu ngia yaarida rikioduu ngii ausaiyauvo mmuaararoovo inna aikioovai. Hama na itaama fafaara rauvaara ni ausaivo mmuaarareeravai. Kiisama ngii ausaiyauvo mmuaararoovaara na rikiaaduu ni ausaivo kiisama mmuaararama kioo pikieeravai. <sup>9</sup> Aanna makee ni ausaivo yoketainoo. Na yanaa yaagueeqaivaa fafaara raduu ngia yaarida rikioduu ngii ausaiyauvo mmuaararoovaara hama ni yoketainoo. Ngia ngii ausaiyauvo mmuaararoovaara hanigiada yoketaama varuuyaara ni yoketainoo. Hama teenoo maisama ngii iiravai. Ngia hanigiada yoketaama variateeraivaara Anutuuqo uuduu mmuaararoovo ngiisi vairavai. <sup>10</sup> Fai Anutuuqoono ausa mmuaararaivaa gioonna kiaapu voovai mmino too hanigiano Anutuuqo

inna vitoo aataru yoketaivau yapa kino  
 inna yoketainaravai. Hama ivo kava ausa  
 mmuaararaivaara yaata utinaravai. Fai gioonna  
 kiaapu voovoono mmatayaa diaa mminnaivaara  
 ausa mmuaararaivaa varoonnnonno hama  
 hanigieerainno putuoo ikia aakiaana tupatupaa  
 varinaravai. <sup>11</sup> Ngii mmuaararoovaara Anutuuqo  
 uudu rikiada ngia arinaima rikiada kava  
 yaagueeqararama kiada inna mmooriivaa  
 iiravai. Itaida varida kuminayaa kua ngiiiki  
 vauvaa ngia kooyaa ngii seenaiya vitairavai. Vaa  
 na rikiauvai. Mmuaararoovo ngiisi vauduu  
 Anutuuqaa nnutuuvo aduoo vauvaara ngii  
 nnannateeravai. Mmuaararoovo ngiisi vauduu  
 irisai maisaivo vauvaara ngia nnikiarairavai.  
 Ngia tunoo: Niinoo ti toonnaata sa teeraa  
 roosiima ti taanarainnoo, kiaa kiada niiyara  
 yoketairavai. Ngia pinaama Anutuuqaara  
 mmuduuya riravai. Ngia makee tuduu vaidi  
 tomeda uvaa ari irisaivaa mmiravai. Tomedaivo  
 ngiiiki vauvaa ngia kua tida safu saafuuma  
 kiooduu rikioo hama kava ngiiiki kuaivo vairavai.

<sup>12</sup> Ivaara na tauraa raa yanaivaa hama na  
 tomeda uu vaidiivaani nnaasu reeravai. Hama na  
 ivo inna tomeda uu vaidiivaaniaatama reeravai.  
 Hameetavee. Ngia Anutuuqaa avuuvau tiiyara  
 mmuduuya ruaivo kooyaa vainai taateeraivaara  
 na mmuakiaaya ngiini reeravai. <sup>13</sup> Ngia itaama  
 varuuvaara ta rikiaannaduu ti yoketairavai.

Hama ta ivaara nnaasu ti yoketairavai. Ngia  
 mmuakiaaya Titiinna tuqinnooduu rikioo inna  
 ausaivo yoketaudu rikioo ivo numa ti kiaa  
 ti mmudu teeta rikiaannaduu ti yoketairavai.

<sup>14</sup> Vaa na tauraa ngiiiyara mannaka kiaa kiee inna kiaa mmiravai. Kiaa mmiaivaa ivo tooduu kaanaivo kutaa vauvaara hama ni mmamma maisairavai. Ta mmuakiaa suaiyauvaki ngiiita kua kutaiyauvaa tiravai. Ta mmuakaraama Titiinnaata ngiiiyara mannaka kiaanna kuaivo kutaa kuavai. <sup>15</sup> Ivo ngiiisi vuu suaivaki ngia mmuakiaaya makee tuduu inna kuaivaa rikiada innara aatuuda biribiriida innara tuqinnoovaara ivo ivaara yaata utuoo ngiiiyara mmuduuya ruuvu vakia roo ngioo ngioo aanna makee pinaavai vainoo. <sup>16</sup> Na yaagueeqama ngiiiyara kiaunoo: Fai ngia aikiooma mmuakiaa aataruvai iikiaaravaivee, kiaa kiee na ivaara sirigakiaunoo.

## 8

*Ausa hanigieeraiyaano sikauyauvaa kati vakiaa mmiaavai*

<sup>1</sup> Ni seenayaso, Maketoniaa vau yoosinnaiyauvaki vaa ausa hanigieeraiya nuuna variraiyauvaki Anutuuqo kati iyara yoketaama yaata utuovaara ta ngii giao ngii mikiai rikiaatee. <sup>2</sup> Mmuararoo ari vookarauyuvo iyasi ngioo iya iinno tooduaata iya mmannammanne sirigama rada nnududu pinaavai vauvaara kaayau sikauyauvaa Anutuuqaa mmooriivaara kati mmiravai. Iya hama mminnaatauya itaama kaayau sikauyauvaa Anutuuqaa mmooriivaara kati mmiravai. <sup>3</sup> Na rikieena na ngii giao ngii miaunoo. Iyasi vau sikauyauvaa aikiooma kati mmiaaree kiaa kiada aikiooma kati iya mmi kiada kava vo sikauyauvaatama kati mmiravai. Ngiarinaidiri ngiari yaata

utiraivaugiataama <sup>4</sup> yaagueeqama ti yaparaida tunoo: Tikiiai Yutayaa gioonna kiaapu vaa ausa hanigieeraiyani yapeera sikauyauvaki teeta yapaarannee? tuduu rikiada ee-oo tuduu yapeeravai. <sup>5</sup> Ta yaata utida kiaannanoo: Iya hama yopeema yapaaravaivee, kiaa ta yaata utuaannaivau vauduu rikioo hayuma itaama mmuubaara ti yoketainoo. Iya tauraa ngiari mmamma mmuyai mmuakiaavai Udaanga Yisuu Kirisiinna mmi kiada nnaagiai Anutuuqo yaata utuuvaugiataama tiita ngiari mmamma mmuyai mmuakiaavai ti mmiravai. <sup>6</sup> Titiiva ii mmoori ivaa ngii tasipama toosa hara uuvaa ta yaagueeqama kiaa mmida kiaannanoo: Iyasi viee mmannammanna iya tasipama yaagueeqama varinai fai iya Yutayaiyara yoketaama yaata utida kati iyani vakiaa sikauyauvaa yapakio viio taikaanaravaivee, tiravai. <sup>7</sup> Vaa ngia mmuakiaa aataruvai taa taika kiaavai. Ngia Anutuuqaara kutaavaivee kiaavo ngii kua tiraivootama ngii yaata vuatinniyyauvootama Anutuuqaa mmooriivaa ngii varaataikiai ngia yaagueeqama ivaara iikiaivootama tiiyara mmuduuya riraivootama vaikiai vaa ngia taa taika kiaavai. Ngia iyauvaa taa taika kiaaneema ngia kati yoketaama yaata utida kati sikau mmira aataruuvaatama yaagueeqama iikiaaraivo inna yoketaavai.

<sup>8</sup> Hama na ivaara yaagueeqama ngii tinai iikiateera itaa kua kiaunoo. Ausa hanigieera vooya ii mmoori ivaara iya yoketaikiai rikiada iikiaavai. Ivaara na ngii giao ngii minai rikiada ngii iikitainai iikio rikioo ngiitama ngii mmuduuya ri-

raivo kooyaa vainai ta taaraivaara na ngii giao  
ngii miaunoo. <sup>9</sup> Udaanga Yisuu Kirisiiva ngii-  
iyara kati yoketaama yaata utiraivo vaivaa vaa  
ngia teeda rikiaavai. Ivo ari voorkaraama yoke-  
taa tuanaama variivoono ngiiyaroо tioo ivo tuoo  
kumina mmanna vaidivai mmata aavau vari-  
ravai. Ngia ari voorkaraama yoketaama varia-  
teeraivaara ivo kumina mmanna vaidivai mmata  
aavau variravai.

<sup>10</sup> Ii kua ivaara na neneenoo yaata utuee ataa  
kua ngii giao ngii minaravee. Ii tauraa taikoo nu-  
anu ivaki ngia toosa hara uu mmooriivaa aanna  
iima taika kiaatee. Ngiengieenoo tauraa ngii au-  
saiyauvo diitooduu sikauyauvaa tauraa kati mmi-  
ravai. <sup>11</sup> Inna aikioovai. Mmidada taika kiaa-  
tee. Toosa hara ngii iikiataikiai yaagueeqama iiki-  
aivaa mmannamanna iida taika kiaatee. Ngii-  
isi vai sikauyauvakidiri aikiooma iikiatee. <sup>12</sup> Fai  
sikauyauvaa kati ngii miataino Anutuuqo ngiiisi  
vai sikauyauvaa too ngia miaa sikauyauvaatama  
too inna aikioovaivee tinaravai. Hama ngii-  
isi sikauyauvo vaiyauvaa vaa Anutuuqo taivai.  
Hama ivo ivaara yaata utuoo vo kuannaa kua  
tiivai.

<sup>13</sup> Ngia pinaa mmooriivaa iida sikauyauvaa  
varada kati Yutayaiyani yapa kikiai iya iyauvaa  
varada kati variateeraivaara hama na ivaara  
kiaunoo. <sup>14</sup> Aa suai aavaki kaayau sikauyauvo  
ngiiisi vaiyauvakidiri iya mmida ngieeta  
iyaatama mmuaakaraama variateeraivaara  
na kiaunoo. Kaayau sikauyauvo ngiiisi  
vaiyauvakidiri hama sikaunnaata kiaa gioonna  
kiaapuuya mmiaaraivo inna yoketaavai.  
Itaama vaino fai yapooma hama sikauyauvo

ngiisi vainai rikiada kaayau sikauyaupo iyasi vaiyauvakidiri fai iya irisai kati ngii miaaravai. Iyaata ngieetama itaama iida fai mmuaakaraama variaaravai. <sup>15</sup> Ivaara Anutuuqaa kua fafaaraivo vainno tinoo:

Gioonna kiaapu voovoono  
yeennaivaa nnutuuvo menaivaa  
kaayauma porooma roo yapooduu  
hama innasi kaayauma suvuairama kioo  
aikiooma vairavai.

Gioonna kiaapu voovoono  
kiisama porooma roo yapooduu  
aikiooma innasiaata vairavaivee.

Kua fafaaraivoono itaa kua tiivai.

*Titiivaata ari seenaivaitanaatama Koridii viravai*

<sup>16</sup> Anutuuqoono tikio rikioo Titiiva ti roosiima ngii tasipama mmooriivaa inna iikiataivaara ta Anutuuqaata kua yoketaivaa kiaunnanoo. <sup>17</sup> Ngiiisi vida sikauyauvaa varaateera mmooriivaa ta inna yaparakiaunnano rikioo inna aikioovaivee kiaa kioo ivo kava ariinoo ari yaata vuatinniivaudiri yaata utikio ngiiisi kuataikio rikioo ngiiisi kuanara iivai. <sup>18</sup> Vaa ausa hanigioo vaidi voovoono Anutuuqaara nuunaira nnau mmuakiaayaauvaki nuainno varioo Yisuunna mmayaaya yoketaivaa gioonna kiaapuuya kiaa mmiaa roo nuaaduu inna nnutuuvo ngiau aapu vairavai. Ii vaidi ivo Titiinna tasipama viio mmoori varaiveeraivaara ta inna titada variaunnanoo. <sup>19</sup> Mmuduuya rida kati sikau mmiateera mmooriivaa ii vaidi ivo ti tasipama nuainno iikiaeveeraivaara gioonna kiaapu vaa ausa hanigieeraiya inna mmataama

kieeravai. Ta ii mmoori ivaa yaagueeqama ti iikiataivaara gioonna kiaapuuya kooyaa teekio ti Udaanga Anutuuqaa nnutuovo ngiau aapu vakiaiveeraivaara ta iikiaara iikiaunnanoo.

<sup>20</sup> Kati mmira sikau kaayau vaiyauvaa ta varada koonnama yapakiai rikiada gioonna kiaapuuya ivaara nunuraanurai tivoora kiaa ta ii aataru ivaara tuqinnama haitatuukiaunnanoo. <sup>21</sup> Hama ta Udaanga Anutuuqaa avuuvau nnaasu safuma sikaura haitatuura aataruuvaa iikiaunnanoo. Anutuuqaa avuuvauunnaata gioonna kiaapuuya avuuyauvunuaatama ta safuma sikaura haitatuura aataruuvaa ti iikiatainoo.

<sup>22</sup> Ivaara ta vaa ausa hanigieera vaidi voovaata vaidiivaitana tasipama mmoori varaiveeraivaara inna kuaneera tida variaunnanoo. Vaa ta airineetu inna iida taaree kiaa rikiaunnano ivo kutaa tuanaa vo mmoori vo mmooriivaa varaanaraivaara yaagueeqama iivai. Aanna makee ivo ngiiyara yaata utuoo tinoo: Fai iya iikiaaravaivee, kiaa kioo yaagueeqama ngiisi kuanaraivaara iinno varinoo. <sup>23</sup> Titiinnara yaata utuatee. Ni vuai ni mmuaa mmoori vareeraivo ngiiyara ni tasipama mmoori varaivai. Mo inna tasipama kuaaraivaitanaara yaata utuatee. Ivaitana vaa ausa hanigieeraiya nuuna variraiyauvaki mmoori vara rada nookiaavo Yisuu Kirisiinna nnutuovo vaa ngiau aapu vaivai. <sup>24</sup> Itaama vainai idaara mmuduuya ruatee. Vaa ausa hanigieeraiya nuuna mmuakiaayaauvaki variraiya ngia Titiivainnara itaama mmuduuya ruaa kuaivaa kooyaa rikiaateeraivaara idaara mmuduuya ruatee. Fai ngia itaama iikio ta ngiiyara mannaka kiaunnaivo kooyaa vainai

rikiaaravai.

## 9

*Ngia Anutuuqaa gioonna kiaapuuyara kati mmira mmooriivaa iikiatee*

<sup>1</sup> Vooyaano Anutuuqaa gioonna kiaapu Yerusareema variaiyani sikauyauvaa kati yapaiyauvaa vaa ngia rikiaavai. Mo hama na kava ivaara fafaara ree ngii giao ngii minaravee. Vaa ngia rikiaavai. <sup>2</sup> Ngieetama yapaaree kiaa iikiaivaa vaa na rikiaunoo. Vaa na Maketoniaa variaa gioonna kiaapuuyaata ngiiyara mannaka kiau kuaivaa ataa kua kiaunoo: Vaa ausa hanigieeraiya mmata Akaiyaivaki variaiya sikau yapaaraivaara vaa ii vo nuanu taikoo ivaki mmuaanaa teerama kieeravaivee. Vaa na ngiiyara mannaka kiau kuaivaa itaa kua kiaunoo. Ngii yapaataikiai ngia yapaara iikiaani vo yoosinna vo yoosinna variaa kaayau vooyaano ii kua ivaa rikiada iyaatama iya ausaiyaupo diitaikiai rikiada yapaara iikiaavai. <sup>3</sup> Ta ngiiyara mannaka kiaunnaivo sa kuminaya vakiaiveeraivaara aanna ti seena vaidi taaravoomada ngiiisi kuateera na tiee variaunoo. Na kiaanoo: Vaa iya mmuaanaa teerama kieeravaivee, kiaa kuaivo kaanaivo vakiaiveeraivaara na vaidi taaravoomada ngiiisi kuateera tiee variaunoo. <sup>4</sup> Fai Maketoniaa gioonna kiaapu vooyaano ti tasipama ngiiisi vida teekiai hama ngia teerairama kikio ti mmamma maisainarainnnoo. Vaa ta ngiiyara kiaannanoo: Vaa mmuaanaa teerama kieeravaivee, kiaanna kuaivo hama kaanaivo vaino ti mmamma maisainarainnnoo.

Ngiitama ngii mmamma maisainarainnoo.  
<sup>5</sup> Taaravooma ido tauraannaadee kuaa ivaara inna na yaata utuauko yoketaavai. Na taura ni seena taaravooma idaa yaagueeqama kiee titanai iyannaadee ngiisi vida ngia kua kiaa teerama kiada kati mmira sikauyauvaa nuunama teerama yapaaraivaara kuaaravai. Iya itaama vida teerama yapa kikiai na ngiisi vino fai aikiooma vainaravai. Fai aikiooma vainai tee na tinara: Ngiari yaata tinniyaadiri kati yapaavaivee. Hama iya yapaataikiainnaata vooyaano iya vuavikiaani teeda yapaavaivee, tinaravai.

<sup>6</sup> Sa aa kua aavaara taunnu kiaatee. Arinaima rikiaatee. Gioonna kiaapu voovoono yeenna hauvaa kiisavai utiivo fai kaanaivaa kisavai varaanaravai. Gioonna kiaapu voovoono yeenna hauvaa kaayauma utiivo fai kaanaivaa kaayauma varaanaravai. <sup>7</sup> Itaama vainai rikiada ngiingii yaata utuaiyauvunugiataama ngia mmuaavai mmuaavai Anutuuqaa kati sikauyauvaa mmiatee. Hama ngii miatainainnaata mmiaarainnoo. Vaidiiyaano ngii vuavi tida mmiateera ngii tikiai rikiada ngia ausa mmuaara-reera tasipama mmiaarainnoo. Ngiengieenoo yaata utida ngii ausa vuatinniyyauvo yoketainai rikiada kati mmiatee. Ngia itaama iikio rikioo Anutuuqo ngiiiyara mmuduuya ruoo fai yoketainaravai. <sup>8</sup> Anutuuqo ngii variraiyauvaara aikiooma ngiiiyara kati yaata utuoo ngiiiyara yoketainai rikiada ngia aikiooma variaaravai. Yoketaama varikio ngii variraiyauvaara mmin-naiyauvaa aikiooma ngii mioo oro hayuma vooyauvaatama ngii minai varakio aikiooma ngi-

iisi vainai fai ngii seenaiya tasipama vo mmoori vo mmooriivaa varaaree kiaa kiada teekio ngia ii mmoori ivaa iikiaara mminnaiyauvo aikiooma ngiisi vainaravai. Ngia itaama variateeraivaara Anutuuqo aikiooma ngii minaravai. <sup>9</sup> Ivaara Anutuuqaa kua fafaaraivo vainno tinoo:

Ivoono hama mminnaatakiaiya  
mminnaiyauvaa kati mmiivai.

Ari koovayakieema kati mmira aataruuvoo  
tupatupaa innaki vaivaivee.

Kua fafaaraivoono itaa kua tiivai. <sup>10</sup> Anutuuqo vaidi yeenna hau utiraiya yeenna hauyauvaa iya mmioo nneera yeennaiyauvaatama iya mmiivoono kati mmira aataruuvoo yeenna hauyauvaa roosiima ngii mikiae hau utikio uruoo ngioo vioo pinaa kioo iiraivo ngia kati mmira aataruuvaa roosiima vainaravai. Fai ngia itaama iikio kati mmira mminnaiyauvo ngiisi vainaravai. <sup>11</sup> Anutuuqo ngii tasipama varinanai ngia yokeetaama varidada teekio ngii seenaiya kati mmira aataruuvoo kooyaa vainai teeda kati iya mmiaaraivaara ngia sikauyauvaa ti mmikiae ta iya mmikiae rikiada iya pinaama Anutuuqaata kua yoketaivaa kiaaravai.

<sup>12</sup> Ngii seena ausa hanigieeraiya hama mminnaataiya ngia itaama kati mmira aataruuvaa kaanaivo hama iyasi nnaasu vaivai. Kaayau gioonna kiaapuuya mmannammanna ivaara Anutuuqaata kua yoketaivaa kiaivotama vaivai. <sup>13</sup> Fai ngia itaama kati mmiaivaara gioonna kiaapu kaayauya ngiiiyara kiaara: Vaa Anutuuqaara kutaavaivee kiaavaivee, kiaaravai. Ngia ngiingii avaiyauvakidiri

ta Yisuu Kirisiinna mmayaaya yoketaivaa iikiaunnavavaivee kiaivaa kaanaivo vaivaara iya Anutuuqaata kua yoketaivaa kiaaravai. Ngia kaayau sikauyauvaa iyaata gioonna kiaapu voonaa mmuakiaayaatama kati mmiaivaara iya Anutuuqaata kua yoketaivaa kiaaravai.

<sup>14</sup> Itaama vainai pinaama Anutuuqo kati ngiiyara yoketaama yaata utiivaara iya ngiiyara yaaku varada varida ngiiyara pinaama mmuduuya ruaaravai. <sup>15</sup> Anutuuqo ari Mmaapuvaa kati ti mmuuvaa nnikiae ta innaata kua tida kua yoketaivaa kiaaravee. Ivo itaama kati ti mmuovo ari vookaraivai vaivaara hama yopeema ta ivaara kua kiaaravee.

## 10

### *Pauruuso ari mmooriivaara kooyaa tiravai*

<sup>1</sup> Na Pauruuso neenoo yamaa kua yamaa kua tiee ataa kua ngii giae ngii minaravee. Vooyaano niiyara tunoo: Ivo ti tasipama varuu suaivaki pata kua tioo boo ikiee tira vaidivai variravaivee, tiravai. Vooyaano niiyara tunoo: Ivo ngieera voopi varuu suaivaki yaagueeqa kua tioo avaikaraira vaidivai variravaivee, tiravai. Iya itaa kua tuu vaidiivo neenoo Yisuu Kirisiiva nuufa vaidivai tirooma aduoo varuneema na yamaa kua yamaa kua tiee ataa kua ngii giae ngii minaravee. <sup>2</sup> Ngia ee-oo tikiae na ngiisi viee fai hama na kua yaagueeqaivaa ngii tinaravai. Gioonna kiaapu vooya tiiyara kiaanoo: Mmatayaa diaa vaidiyaano mmatayaa diaa aataruuvaa mmoori iikiaanoo, kiaiya na aikiooma kua yaagueeqaivaa iya tinaravai.

**3** Inna aikioo ta mmatayaa diaiya varidaata hama ta mmatayaa diaa yaata utiraivaugiaataama yaata utida yaagueeqama mmoori varaunnavaai.

**4** Vaidi mmatayaa diaiya rapuaara iida varida ngiari suru veeva tipaa ganifaiyauvaa varada vida yoosinna yaagueeqama diraiyaata rapidada iya yaatara kiaavai. Ivaan roosiima ta Anutuuqaa mmooriivaa yaagueeqama iida varida hama ta mmatayaa diaa suru veeva tipaa ganifaiyauvaadiri iikiaunnavai. Ta Anutuuqaa yaagueeqa ari vookaraivaadiri iikiaunnavai. Ta ivaadiri iida maisa aataruuyaauvo yaagueeqama diiyauvaa fai ta yaatara kikio taikaanaravai.

**5** Unnakua unnakua kiaa kiada kooyaa ngiari kiaa mmi ngiari kiaa mmiira aataruuyaauvaa ta yaatara kikio taikaanaravai. Gioonna kiaapuuya Anutuuqaara arinaima rikiaa aataruuvaa vooyaano ngiariiyara mannaka tida ivaan atau rira aataruuvaa ta aikiooma ooqoo tikio taikaanaravai. Mmuakiaa yaata utiraiyauvaa ta adida pikiada Yisuu Kirisiinna aataruuvaa nnaasu yaata utida iikiaunnavai. **6** Na kiau kuaivaa ngia arinaima rikiada ngii iikiatainai iima taika kikiai ngiikidiri vooya ni kuaivaa rikiadaata yaataraiya ta irisai maisaivaa iya mmiaaraivaara teerakiaunnanoo.

**7** Ngia mmaanai kooyaa ngii avuuyauvunu vaiyauvaa nnaasu taavaivee. Ngiiikidiri vaidi voovoono ariiyara yaata utuoo tinoo: Na Yisuu Kirisiinna vaidivai variaunoo, tiinnee? Itaama yaata utii vaidiivo kava ariiyara tuqinnama yaata utuoo rikiaivee. Hama ivo nnaasu Yisuu Kirisiinna vaidivai varivai. Teetaatama Yisuu

Kirisiinna vaidiya variaunnanoo. <sup>8</sup> Ti Udaanga Yisuu Kirisiiva ari mmooriivaara yaata utuoo nnutu varada iira yaagueeqaivaa ti mmiravai. Ngia innara iidada koovayaida variateeraivaara ti mmiravai. Hama ta ngiiyara ooqoo tikiiai ngia maisama variateeraivaara ti mmiravai. Ti Udaanga Yisuu Kirisiiva yaagueeqaivaa itaama ti mmiivaara na pinaama titiiyara mannaka kiauvaara hama na ni mmamma maisainoo. <sup>9</sup> Na yanaiyauvaa ngiiini fafaarakiaaduu vuuyauvaa hama ngia iyauvaa yaarida aatuukiateeraivaara na fafaarairavai. <sup>10</sup> Gioonna kiaapu voovoono fai tinara: Pauruuso yanaiyauvaa fafaarakio tiisi nniiyauvo avaikarai kuayauvai tiisi nniivai. Ivo numa ti tasipama varikiai rikiada ta taunnano muaraagai vaidivai varikio inna kuaivo mmanna kuavaivee, tinaravai. <sup>11</sup> Fai itaa kua tinara vaidiivo arinaima rikiaeivee. Ta ngieeradiri varida yanaiyauvaa fafaarakiaunnano kuaiyauvootama ta ngii tasipama varida iikiaaraiyauvootama mmuaakaraivai vaivai. Hama ari vookaraivai vaivai.

<sup>12</sup> Gioonna kiaapu vooya itaama ngiariiyara ta yoketaayavee kiaa kiada ngiari nnutuuyauvaa ngiau yapaaneema ta iya roosiima titiiyara yaata utida variaunnannee? Ai mo hama iya ti roosiima mmuaakaraama variaavai. Iya ngiari variraivau-giataama varida ivaa teeda kiaanoo: Ta aikiooma variaunnanoo, kiaiya hama tinni ruaaya iya kumimaka tuanaaya variaavai. <sup>13</sup> Hama mo ta titiiyara mannaka kiaunnaivo fai yaatarama vainaravai. Anutuuqo ni mmoori varaateera ti mmataama kioo tuu mmooriivaa ta varada ivaara

nnaasu fai ta titiiyara mannaka kiaaravai. Ii mmoori ivaa ta iikiaannaivo vaa ngiisiaatama viravai. <sup>14</sup> Ta ngiisi kuaanna suaivaki Anutuuqo tiiyara atau yapa kioovaa hama ta hederaida vida titiiyara mannaka tiravai. Ta Anutuuqo ti mmataama kioovaki toosa hara ngiisi vida Yisuu Kirisiinna mmayaaya yoketaivaa ngii giao ngii miravai. <sup>15</sup> Anutuuqo tiiyara atau yapa kioovaa hama ta vida hederaida ivaki vau mmooriyauvaa vooya uuyauvaara ta titiiyara mannaka kiaunnavai. Hameetavee. Ngia Yisuu Kirisiinnara kutaavaivee kiaivo vakia roo vioo vioo pinaavai vakiaiveera ta faannaida varida ngiisi yara mmoori varaunnavai. Anutuuqo atau yapa kioovaa aakiaivaki ta mmoori varaunnavo vakia roo vioo vioo pinaavai vainai <sup>16</sup> ta ngii pikadi vo mmata vo mmata variaiyasi vida mmayaaya yoketaivaa iya kiaa mmiaaravai. Ta itaama iida ari vo vaidi voovoono tauraa vaa mmoori iivaki hama ta ivaki vida mmoori varada ivo vaa ii mmooriivaara titiiyara mannaka kiaaravai. <sup>17</sup> Ivaara Anutuuqaa kua fafaaraivo vainno tinoo: Gioonna kiaapu voovoono ariiyara mannaka tinaree kiaa sa ariiyara mannaka kiaivee. Udaanga Anutuuqaara nnaasu mannaka kiaivee. Kua fafaaraivoon itaa kua tiivai. <sup>18</sup> Udaanga Anutuuqo vaidi voovaara inna aikiooma vari vaidivaivee tiivo inna Anutuuqaa avuvau yoketaa vaidivai varivai. Vaidi voovoono arinaidiri ariiyara na yoketaa vaidivaivee tiivo Anutuuqaa avuvau hama yoketaivai varivai.

*Pauruuso unnakua aposorooya yaatarezeraavai*

<sup>1</sup> Na kiisama yaata duunaano kua tirayaama tinaa rikiada sa ni reeroo reemmoo tiraida teeda rikiadaata tirooma variatee. Tirooma varida ni kuaivaa rikiaatee. <sup>2</sup> Anutuuqo ngii haitatumma too kaayauma ngiiyara yoketairaivaa roosiima na ngii haitatumma tee kaayauma ngiiyara yoketaakiaunoo. Kiaatanna yoketaa tuanaa hama sabi nuairaivaa vaidiyya ngiaammuaau yoketaa voovai mmiaaraivaara kua kiaa teerama kieeraivaa roosiima na ngiiyara kua kiaa teerama kiee Yisuu Kirisiinna mmuaat tuanaivaa ngii mmataama kieeravai. <sup>3</sup> Na pinaama yaata utuaunoo. Yapaivo Evaanna iinno taanaree kiaa unnakua kiaa uuvaa roosiima vaidi vooya ngii unnakua kiaa ngii iida taaree kiaa tikiai ngia safuma varida Yisuu Kirisiinnara yoketaama yaata utiraivaa pikievooraivaara na yaata utuauko ni mmuaararainoo. <sup>4</sup> Ta Yisuu Kirisiinnara kua kutaivaa ngii giao ngii miaannaivaa roosiima ari vo vaidi voovoono Yisuunnayaadiri mmataama kioo unnakua vooyauvai ngii giao ngii muduu rikiada ngia makee tuduu ngingii ausa mmuduuyaiyauvaa inna mmida inna kuaivaara kutaavaivee tiravai. Ta Mmannasa Yoketaivaaraata Yisuunna mmayaaya yoketaivaaraatama ngii giao ngii miaanna kuaivaa roosiima ari vo vaidi voovoono ari vo mmannasaivaaraata ari vo mmayaayaivaaraatama ngii giao ngii muduu rikiada ngia makee tuduu ngingii ausa mmuduuyaiyauvaa inna mmida inna kuaivaara kutaavaivee tiravai. Ngia itaama iikiaivaara na ngiiyara yaata utuauko ni mmuaararainoo.

<sup>5</sup> Itaa kua tira vaidiiyara ngia ngii yoketaikiai ti aposorooyavee tiraiyara na yaata utuauko hama ni yaataraavai. <sup>6</sup> Na niniiyara yaata utuauko kutaa ni tinniivo aikiooma kua oyaivaa varaikio ni avaivakidiri na kua oyaivaa kiauvo kiaa fannifaanniima kiauvai. Ni tinniivo aikiooma kua oyaivaa varaivaara mmuakiaa suai na nuaina variee ita ataama ngii giao ngii miau suaiyauvaki vaa ta kooyaa ngii vitaakiaunnavaai.

<sup>7</sup> Na mmayaaya yoketaivaa ngii giao ngii miaa suaiyauvaki hama na irisai mminnaiyauvaa vareeravai. Ngii nnutuuyaovo ngiau aapu vakiaeeraivaara na adiee variee mmoori vareeravai. Na itaama iikiau aataruovo koonnai aataruvai na iiravainnee? <sup>8</sup> Na ngii tasipama mmoori varee variaa suaivaki ngiari voopinnaa vaa ausa hanigieeraiya sikauyauvaa ni miravai. Hama na iya mmoori varaivaara iya sikauyauvaa ni miravai. Na ngii tasipama mmoori varaivaara iya sikauyauvaa kati ni muduu na mmuara vareeraivaa roosiima iya sikauyauvaa varee ngii mmoori vareeravai. <sup>9</sup> Na ngii tasipama variaa suaivaki hama niisi vau mminnaiyauvaara hama na ngii yaparairavai. Maketoniaa varuu gioonna kiaapu vaa ausa hanigiooyaano sikauyauvaa ni muduu na iyauvaadiri hama niisi vau mminnaiyauvaa vareeravai. Itaama hama na ngii yaparaira variaaneema fai yapooma mmuaikaraama hama na ngii yapara rinaravai. Na ngii yaparaino ngii mmuaarareevoora hama na ngii yapara rinaravai. <sup>10</sup> Yisuu Kirisiinna kua kutaivo ni aakiaivaki vaivaara na kua kutaavai ataa kua

tiee ngii giaa ngii minaravee. Na itaama variee hama mminnaara ngii yaparairaina kati mmoori varaivaara na niniiyara mannaka kiaunoo. Na itaama niniiyara mannaka kiau kuaivaa Akaiya mmataivau variaa gioonna kiaapuuya rikikio hama vaidi voovoono yopeema atau rinaravai.

**11** Mo na aaniira itaa kua kiaunnee? Hama na ngiiiyara mmuduuya ruauvaaraina itaa kua kiaunnee? Hameetavee. Na ngiiiyara mmuduuya ruauvaa Anutuuqo vaa taivai.

**12** Vaidi vooya ngiariiyara ta aposorooyavee tira vaidiyya sa iya ngiariiyara mannaka tida kiatee: Ta Pauruusainna mmooriivaa iikiaaneema iikiaunnavaivee, kiatee. Sa iya itaa kua kiateeraivaara fai na nini mmooriivaa na makee kati ngiiiyara iikiauneema mmannammanna itaavai iina nnaasu varinarovai. **13** Ii vaidi iya hama kua kutaa aposorooya variaavai. Unnakua aposorooya variaavai. Iya ngiari mmooriiyauvaara unnakua kiaa kiada ngiari vookaraama mmooriiyauvaa iida varida Yisuunnayaadiri yadata rummuu kiada kiaanoo: Ta Yisuu Kirisiinna aposoroo tuanaayavee, kiaavai. **14** Iya itaama iikiaivaara hama na nnikiaraakiaunoo. Mo Sataango ariinoo aikiooma aangeraa mmeekia teeraivaa hababainno mmooriivaa iivai. **15** Ivaara fai inna mmoori vareera vaidiyya safuma varira vaidiyya roosiima mmooriiyauvaa iida kiaara: Ta safuma mmoori vareera vaidiyavee, kiaaraivo inna hama nnikiaraakiateera kuavai. Iya taikeera suaivaki ngiari iikiaa mmooriiyauvaa irisai maisaiyauvaa fai safuma ngiari varaaravai.

*Pauruuso aposoroo vaidivoonora tuoo kaayau*

*mmuaararoovaa vareeravai*

<sup>16</sup> Na tauraa kiau kua voovai na kava tinaravee. Sa gioonna kiaapu voovoono niiyara yaata utuoo kiaevee: Ivo yaata duuna vaidivaivee, kiaevee. Fai ngia itaa kua tida seeda mmooka haniglia ni miatee. Niyyara yoketaakiatee. Fai ngia niyyara yoketaikiai na kiisama niniiyara mannaka tinaraivo vainaravai. <sup>17</sup> Na itaa kua kiau kuaiyaa hama Udaanga Yisuuvvaano ni giao ni mikiai kiaunoo. Yaata duunaano kua tirayaama na neneenoo kua kiaunoo. <sup>18</sup> Kaayau vaidiyya ngiari mmoori mmatayaa diaa iiraiyauvaara ngiari mannaka kiaaneema na niniiyara mannaka kiaunoo. <sup>19</sup> Ngia ngiingiiyara ta tinni yoketaayavee kiaa kiada koonnai kuaivaa ngii giao ngii maiya kuaiyauvaara ngii yoketaikiai iya tasipama variaavai. <sup>20</sup> Vooya ti mmoori varaaeteera ngii vitaaree kiaa kiada ngii mminnaiyauvunudiri mmuara aataruvaa iima rada ngii unnakua unnakua kiaa rada ngia iikiainaaree kiaa ngii iida teeda ngiiyara nniki rakaida ngii yaata rudauda varikiai teeda rikiadaata inna aikiooyaivee kiaa kiada variavai. <sup>21</sup> Ngia itaama iikiaivaara kua voovai na niniiyara mmataama kiee kiaunoo: Ni mmama maisainoo. Ta ngii tasipama variaanna suaivaki ta muaraagama varidara tida hama yopeema itaama ngiiyara iiravaivee, kiaunoo.

Iya hama aatuuraida vo aataru voovaara ngiariiyara mannaka tikiai mo neetama ivaara aikiooma niniiyara mannaka tinaravai. Na itaa kua kiauvo yaata duunaira vaidiaano tirayaama na kiaunoo. <sup>22</sup> Iya ngiariiyara ta Eporai kuaivaa kiaunnayavee kiaannee? Mo neeta Eporai

kuaivaa kiau vaidivai. Iya ngiariiyara ta Isarairaa vaidiyavee kiaannee? Mo neeta Isarairaa vaidivai. Iya ngiariiyara ta Aaparahaamaa oyaivakidiri diitaunnayavee kiaannee? Mo neeta Aaparahaamaa oyaivakinnaa vaidivai. <sup>23</sup> Iya Yisuu Kirisiinna mmoori varaa vaidiyannee? Mo na yaata duuna vaidiivaa roosiima ataa kua tinaravee. Na Yisuu Kirisiinna mmooriivaa varauvoono iya yaatarauvai. Na yaagueeqama kiee mmooriivaa varaivo na iya mmoori varaivaa yaatareeravai. Vaidiiya na Yisuunna mmoori varaivaara kiaa kiada oovi nnauvaki airineetu ni yapa kiooduu na varaivoono iya varuuyauvaa yaatareeravai. Vooyaano kaayauneetu ni ripuuduu vooyaano kaayauneetu ni ruputuduun na putueenana rikieennaata variravai. Na itaama variaivo iya itaama varuuvaa yaatareeravai. <sup>24</sup> Yaaku saineetu Yutayaa vaidiiya yeenavaadiri ni ripiikiaivo vo vaidivai yuku yaaku taika kioo vo vaidivai yaakuuvaitana yuku saivai saivakidiri taarama taaramaneetu (39) vairavai. <sup>25</sup> Roomaa vaidiiya taaravoomaneetu buaagaivaadiri ni ripiiravai. Mmuaneetu vaidiiya sikauyauvaadiri habati kiada ni riravai. Taaravoomaneetu siipaiyauvaki na variaaduu nnooriivo siipaiyauvaa rummua ruvuarata kiooduu nnoori varaivau variravai. Vo suai ikiannaivaata heenaivaata vara kuainnema kiee na nnoori varaivau siipa sagaivau variaaduu sabisaabi ni varoo nuairavai. <sup>26</sup> Makemakee na ngieera vo yoosinna vo yoosinnaiyauvaki nuaina variaa suaiyauvaki nnooriyuavo hainno ni ruputu fannifaannuuduu mmuara furai vaidiiya

ni ruputida ni mminnaiyauvaa mmuara varaaree kiaa uduu ni seena Yutayaiya ni ruputuaara uduu ngiari voopinnaiyaatama mmuaikaraama ni ruputuaara iiravai. Na nnau yoosinna pinaa aakiaiyauvaki nookiaaduu vaidiyya ni mmaara kuaivaa tida ni ruputuaara uduu na mmanna mmata hama vadiaatauyauvunu nookiaaduu maisa aataruovo niisi nnuduu ni putuataaduu na maisama nuaina variravai. Na siipaivaki karee nnoori pinaivau viee variaaduu nnooriivo ni ruputuataama uduu gioonna kiaapuuya unnakua unnakua tida tunoo: Ti seenavaivee, kiaa kiada ni ruputuaara iiravai.

<sup>27</sup> Na pinaa mmooriivaa nniki vata vatama kiee yaagueeqama kiee varee airineetu na mmoori varee variee heenaiyauvaki hama na vuru vairavai. Vo suai vo suai ni yeenna rauduu ni nnoori rauduu airineetu hama ni yeennaataaduu hama ni nnaunnaataaduu hama ni uyira rairaataaduu na kati variravai.

<sup>28</sup> Itaama vauduaata vo yoosinna vo yoosinna vaa ausa hanigiada Anutuuqaara nuunakiaiyara na haitatuunaraivaara mmuakiaa suai na iyara yaata utuauko ni mmuaararainoo. <sup>29</sup> Fai gioonna kiaapu voovoono Anutuuqaa aataruuvaa inna mmuaararano pinaama muaraagama varinai neeta innara boo tiee inna mmuaararaivaa varaanaravai. Fai gioonna kiaapu voovoono haruruoo mminnamminnaa maisaivaa varano ni ausaivo pinaama mmuaararaanaravai.

<sup>30</sup> Fai na niniiyara mannaka tinaree tiee na Anutuuqaa mmooriivaa varaukai ni nnammutuaiya ni nnutuuvaa varadu yapa

kiada niiyara muaraagavaivee kiaivaara na niniyyara mannaka tinaravai. <sup>31</sup> Udaanga Yisuunna Koonna Anutuuqaara ta tupatupaa kiaunnanoo: Ivo yoketaavaivee, kiaunnaivoono arinaima too rikiaivai. Na itaa kua kiauvo hama na unnakua kiaunoo. <sup>32</sup> Na Damasakuusa variaa suaivaki kieeta vaidiivaa Ariteenna nnoonna vaidiivoono ari rapira ngiaammuuya titooduu sikau vagiaamunna keegiaiyauvaki ni mmaara suriravai. <sup>33</sup> Surida varuduun ni seenaiya vagiaamunna tabaangaidaadiru sookuya utua pinaa voovaki ni rummua kiada tapuka yeenavaa haru kiada utida mmaanai reemma kiooduu mmataivau tuma ruee na nene taivau viravai.

## 12

*Pauruusoono ari avu tinniivo hanigooduu toovaara tiravai*

<sup>1</sup> Na yaata utuee rikiauko niniyyara na mannaka tiraivo hama yoketaikio hama kaanaivo vaivai. Itaama vaikiainnaata na vootama kava niniyyara mannaka kiaunoo. Ni variraivaara ngia arinaima teeda rikiaateeraivaara na niniyyara mannaka kiaunoo. Aa kua aavaa na ngii giao ngii minaravee. Na ni avu tinniivo hanigooduu na tee rikiaa kuaivaatama Udaanga Yisuu Kirisiiva ivakidiri ni giao ni muduu na tee rikiaa kuaivaatama ngii giao ngii minai rikiaatee. <sup>2</sup> Vaa na ausa hanigia kiee Yisuu Kirisiinna vaidivai variaaduu rikioo Anutuuqo ni vitoo ngiau aapu aruoo tuanaivaki ni yapa kieeravai. Ii suai ivakidiri na yaaruauko nuanu yaakuuvaitana yukukidiri taarama taarama nuanuudo vaa taika kiaivai. Iqii suai ivaki na

kooyaa ni mmammaivaata ngiau aapuuvaki viravainnee? Vara ni avu tinniivo hanigooduu na taivaa roosiima ngiau aapuuvaki viravainnee? Hama na tauvai. Anutuuqoono nnaasu taivai.

<sup>3</sup> Na kava ngii giao ngii minai rikiaatee. Vaa na tauvai. Anutuuqoono ni vitoo ngiau aapu yoosinnaivaa nnutuovo Paratiisa ivaki ni yapa kieeravai. Na kava tinai rikiaatee. Na kutaa ngiau aapuuvaki viravainnee? Vara ni avu tinniivo hanigooduu na taivaa roosiima ngiau aapuuvaki viravainnee? Hama na tauvaivee. Anutuuqoono nnaasu taivaivee.

<sup>4</sup> Na ngiau aapuuvaki vее ari voorkarau kuaivaa hama yopeema kooyaa tinara kuaivaa na rikieeravai. Hama yopeema vaidivo rikioo kiataira kuavai na rikieeravai.

<sup>5</sup> Na itaama ngiau aapu vее taivaara fai na aikiooma niniiyara mannaka tinaravai. Fai hama na nene iikiauvaara niniiyara mannaka tinaravai. Hama aaniivaara na niniiyara mannaka tinaravai. Na Anutuuqaa mmooriivaa varaukai ni nnammutuaiya ni nnutuuvaa varadu kiaivaara nnaasu fai na niniiyara mannaka tinaravai.

<sup>6</sup> Kutaa na niniiyara mannaka tinaree tiee na kua kutaivaa ngii giao ngii minaraivaara hama na yaata duuna vaidivai variauvai. Gioonna kiaapuuya safuma na iikiauvaa teeda na kua kiauvaa rikiada na iikiauvaugiataama na kua kiauvauigiataama safuma niiyara yaata utuateeraivaara na hama niniiyara mannaka tinaravai.

<sup>7</sup> Na ari voorkarau ari voorkaraiyauvaa tauvaara na niniiyara nnoonnavavaivee kiataavai. Anutuuqoono sa na itaa kua kiaiveeraivaara mmamma nniitareera maisauvo niiyaa vauvaara

ee-oo tiravai. Ii nniitareera maisa ivaa Sataango ni mmammaivau yapa kiooduu vaududuun na hama niniiyara mannaka tinaraivaara Anutuuqaa avaivaura niisi vairavai. Vauvo mmannammanna homo niisi vainoo. <sup>8</sup> Na taaravoomaneetu Udaanga Yisuu Kirisiinnaata kua tiee yaaku varee mmuaararoovaa niiyadiri rugaiveeraivaara na yaaku vareeravai. <sup>9</sup> Yaaku varaaduu ivo sai ni tunoo: Na i tasipama variee aiyara kati yoketaama yaata utuee varinai a aikiooma varinaravai. A muaraagama varianna suaivaki na yaagueeqama i tasipama varino ni yaagueeqaivaa kaanaivo kooyaa vainaraivaara na itaa kua kiaunoo. Ivo itaa kua tuuvaara mmuaararaivo niisi vaikiai na muaraagama variauvaara na niniiyara mannaka tiee sirigakiaunoo. Yisuu Kirisiinna yaagueeqaivo niiyaa rummua apu kioo vainno ni tuqinnanai na ivaa rikiaanaraivaara na niniiyara mannaka tiee sirigakiaunoo. <sup>10</sup> Na Yisuu Kirisiinna mmoori vareera vaidivoonora tiee na ni mmammaivo muaraagaikiaonnaata variaukai iya maisa kua ni kiaani na variauko ni mmuaararaikiai iya ni ruputida itaida variaavo ari vookara ari vookarai mmuaararaiyuvo niisi vaikiainnaata na inna aikioovaivee kiaa kiee yoketaama variauvai. Na ni mmammaivo muaraagaikiaonnaata variau suaivaki na yaagueeqama variauvaara na itaa kua kiaunoo.

*Koridii varaiyara Pauruuso pinaama yaata utuoo tiravai*

<sup>11</sup> Ngieenoo niiyara mannaka kiataavai vaikiainnaata na neneenoo niniiyara mannaka ki-

auvo inna yaata duunaano tirayaama na kiauvai. Ngieenoo hama niiyara mannaka kiaivaara na itaa kua kiauvai. Na kutaa kumina vaidivai variaukai rikiada ngia vo vaidi vooyara ngii yokaetaikai ti aposorooyavee kiaiya na yaata utuaukai hama iya ni yaataraavai. <sup>12</sup> Aposoroo tuanaiya iira mmooriyauvaa na ngii nuuna aakiaiyauvaki yaaagueeqama kiee iikiaaduduu rikiada ngia tooduu kooyaa vairavai. Na Anutuuqaa mmoori ari vookara ari vookarau yoketauyauvaa iikiaaduu ngii avuuyauvunu diitooduu ngia tooduu kooyaa vairavai. <sup>13</sup> Ngia aaniira ngiari voopinna voopinnaaya Anutuuqaara nuunama variraiyauvaara yaata utida kiaanoo: Ti yaataraavaivee, kiaannee? Mo na iya tasipama mmoori varaa suaivaki iya sikauyauvaa ni muduu na vareeravai. Na ngii tasipama mmoori varaa suaivaki hama na ngii sikauyauvaa varaivaara ngia itaa kua kiaannee? Boo, na hama ngii yaparakiavaara na koonnama iiravainnee? Sa ivaara yaata utiraida ngii ausaiyauvaa ni miatee.

<sup>14</sup> Na taaraneetu ngiisi viee aanna na taaravoomaneetuuvau ngiisi kuanara teerataaraina variaunoo. Fai na ngiisi viee mminnaara ngii yaparaino ngii mmuaarareevoora hama na ngii yaparainaravai. Hama na ngii sikauyauvaa varaanaraivaara mmoori varauvai. Ngia yoketaama variateeraivaara na mmoori varauvai. Mo kutaa kuavai. Hama nnaakaraiya mmoori varada sikau mminnaiyauvaa varada ngiari kaano kooya mmiaavai. Ngiali kaano kooyaano mmoori varada sikau yeenna mminnamminnaiyauvaa

ngiari nnaakaraiya mmiaavai. <sup>15</sup> Ngia ausa hanigiada yoketaama variateeraivaara na niisi vai mminnaa mmuakiaayauvai kati ngiiiyara ni yoketaivaara kagaari kiee ni variraivaatama ngiiiyara yapaanaraivo inna ni yoketainoo. Fai na itaama iina ngiiiyara pinaama mmuduuya rinal ngia irisai kiisama niiyara mmuduuya ruaarannee?

<sup>16</sup> Inna aikioo itaama vaikiai vaa ngia rikiaavai. Na ngiisi kuaa suaivaki hama na mminnaiyauvaara ngii yaparakiaivaara hama ngii mmuaara-reeravai. Mo vooyaano kiaanoo: Ivo ti unnakua kiaa kioo ti iinno taanaree kiaa kioo ta sikauyauvaa yapaateera tiravaivee, kiaavai. <sup>17</sup> Ai mo dataama na itaama iiravainnee? Na vaidi vooya ngiisi titaaduu vuuyaano ngii unnakua kiaa kiada itaama iiravainnee? <sup>18</sup> Mo na yamaa kua yamaa kua Titiinna kiaaduu ngiisi viravai. Na inna seena vaidi ausa hanigoo voovaatama inna tasi-pama titaaduu viravai. Mo Titiiva ngiisidiri ngii unnakua kiaa kioo mminnaiyauvaa vareeravainnee? Hameetavee. Neeta ivootama mmuaaa ausa mmuaaa vuatinnevai varada mmuaavaugiaataama mmoori vareeravai.

<sup>19</sup> Ti seena ta ngiiiyara mmuduuya ruauunaiyaso, ta yanaivau fafaara raanna kuaivaara ngia yaata utida tunoo: Ti avuuyauvunu ngiariiyaroo tida itaa kua kiaavaivee, kiaa ngia yaata utuaannee? Ai hameetavee. Yisuu Kirisiiva tiiki variivaara ivo tiine tiineema nnaasu ta kuaivaa tida Anutuuqaa avuuvau mmuakiaa mmoorivai ta iikiaunnaiyauvaa ta ngiiiyaroo tida iikiaunnavai. Ngia yoketaama varia rada vidada nnaagiai ngia

yaagueeqama variaaraivaara ta iikiaunnnavai.  
**20** Ngia yoketaama variaaraivaara ni taatainai na ngiisi vее ngii teenai ngia koonnama ari vookaraama varivoora na pinaama yaata utuauko ni pirisainoo. Na ngiisi vее ngii tasipama yoketaama varinaraivaara na ni ngii taatainai na ngiisi vее ngii tee ngii tino ngii maisaivoora na pinaama yaata utuauko ni pirisainoo. Na ngiisi vее ngii teenai rikiada ngia ngingiiita ngingiiita buaaru tida varida ngingii yaatara ngingii yaatara kiaivaara ngii nnannateenai varida ngingiiyara ngingiiyara nnaasu yaata utuaaravai. Yaata utida varida ngingii seenaiyayaadiri koonnama yaata utida unnakua tida varida iyara murumuru tida varida ngingiiyara mannaka tida koonnakaannama varivoora na pinaama yaata utuauko ni pirisainoo. **21** Fai na kava ngiisi vino Udaanga Anutuuqo ni tinai ngii avuuyaavunu ni mmamma maisaivoora na pinaama yaata utuauko ni pirisainoo. Ngiikidiri vooyaano nnaaru mminnamminnaa maisaiyauvaa varaiya homo maisama yaata utida sabi nuaida ngiari mmammaiyaavaara nnaasu yaata utida makemakee sabi nuaira aataruvuvaai iida varida ngiari yaata utiraiyauvunugiataama nnaasu varida hama ii aataru iyauvaara yaata utida mmooka haniglia mmida varaiiyara na yaata utuaunoo. Na ngiisi vее iya teeno ni ausaivo kaayauma ni mmuaarareevoora na pinaama yaata utuauko ni pirisainoo.

# 13

*Pauruuso nnaagiai kua tioo yaagueeqama vari-ateera tiravai*

<sup>1</sup> Na taaraneetu ngiisi vее aanna na taaravoomaneetuvau ngiisi kuanara iikiaunoo. Anutuuqaa kua fafaaraivo vainno tinoo: A kua pinaana vaidiivaa yapaanaree tiee taaramannee taaravooma vaidiido vaa ivo tomeda iivaa taidaatama vitee kiee inna yaparakianee. Kua fafaaraivo itaa kua tiivai. <sup>2</sup> Ngia nnaaru mminnamminnaa maisaiyauvaa varooyaatama ngia mmuakiaa voonaatama na taaraneetu ngiisi kuua suaivaki ngii giao ngii miaa kuaivaa aanna na ngieeradiri variee kava ngii giao ngii miee ataa kua tinai rikiaatee. Fai na kava ngiisi vее ngii mminnamminnaa maisaiyauvaara ngii tinai rikiada ngiikidiri tomeda iikiaiya fai kutaa irisai maisaiyauvaa varaaravaivee. <sup>3</sup> Fai na itaama iino rikioo Yisuu Kirisiiva ni giao ni mikiai na kua kiauvo kooyaa vaineravai. Yisuu Kirisiiva ngii mminnamminnaa maisaiyauvaara safuma irisaiyauvaa ngii minaree tuoo hama muaraagama iinno ngii mivai. Ngii nuuna aakiaiyauvaki yaagueeqama iinno varivai. <sup>4</sup> Kuttaa nnaaru ivo vaidivai varioo muaraagama uuduu rikiada iya yatari sagaivau inna haara kieeravai. Aanna makee Anutuuqaa yaagueeqaivaura hara kioo varinoo. Teeta ivo tiiki vari vaidiyara tida mmuaikaraama muaraagama variaunnanoo. Aanna ta inna tasipama Anutuuqaa yaagueeqaivaura hara kiada varida ngiyyara mmooriivaa iikiaaravai.

<sup>5</sup> Ngia ngiingii aakiaiyauvaki tuqinnama taatee. Ngia Anutuuqaara kutaavaivee kiaa aataruvauvaada ngia hara kiada variaannee? Tuqinnama ngiingiiyara yaata utida rikiaatee. Mo vaa ngia rikiaavai. Yisuu Kirisiiva ngii aakiaiyauvaki varinoo. Mo vara ngia ngii aakiaiyauvaki taavo hama variinnee? Vara ngia kati unnakua kiaa kiada kutaavaivee kiaannee? <sup>6</sup> Fai ngia ngiingii aakiaiyauvaki itaama teekio too Yisuu Kirisiiva kutaa varinai ta inna mmooriivaa kutaa varauunnaivaa kaanaivo kooyaa vainai ngia ivaa taaraivaara ta yaata utuaunnanoo. <sup>7</sup> Sa ngia koonnama variateeraivaara ta Anutuuqaata kua tida yaaku varauunnanoo. Ti mmooriivaa kaanaivo kooyaa vainaraivaara hama ta itaama yaaku varauunnanoo. Ngiiikidiri vooyaano kiaanoo: Iya mmooriivo fanniinaravee, kiaani-aata ngia safuuma variateeraivaara ta Anutuuqaata kua tida yaaku varauunnanoo. <sup>8</sup> Hama yopeema ta vo aataru vo aataruuvaadiri iida kua kutaa aataruuvaa uuda rammuaaravai. Ta kua kutaa aataruuvaa nnaasu iida yariaaravai. <sup>9</sup> Ta muaraagama variaunnani ngia yaagueeqama variaivaara ti yoketainoo. Ngia Anutuuqaa aataruuvaa iidada arinaima teeda koovayama kiada variateeraivaara ta yaaku varauunnanoo. <sup>10</sup> Ivaara na ngieeradiri variee aa kua aayauvaa fafaarakiaunoo. Ngia koonnama variaivaara na ngiisi viee Udaanga Yisuu Kirisiiva ni tikiai na inna yaagueeqaivaura ngii tino ngii ausa mmuaarareevoora na ngieeradiri variee aa kua aayauvaa fafaarakiaunoo. Yisuu Kirisiiva ni tikiai na inna yaagueeqaivaura kiau kuaivaa na kiau-

vai. Na hama ngia Anutuuqaa aataruuvaa piki-aateera kuavai kiauvai. Ngia inna aataruuvaa iidada koovayaida variateera kuavai na kiauvai.

<sup>11</sup> Ni seenayaso, ni kua nnaagiaivaa na tinai rikiaatee. Yoketaama variatee. Ngia Anutuuqaa aataruuvaa iidada arinaima koovayaida variaaraivaara yaagueeqama mmoori varaatee. Na ngii giao ngii miau kuaiyauvaa arinaima rikiaatee. Ngiingiiyara ngiingiiyara mmuua ausa mmuua tinnivai varada ausa nuufa tasipama variatee. Fai ngia itaama iikio Anutuuqo mmuduuya rira ausa nuufa nakaaraivoono ngii tasipama varinaravai.

<sup>12</sup> Ngia ngiingii seenaiya yaaku rumisida iyara yoketaakiatee.

<sup>13</sup> Anutuuqaa gioonna kiaapu aavakinnaa mmuakiaaya ngiinyara yaata utida boo kiaavai.

<sup>14</sup> Ti Udaanga Yisuu Kirisiiva kati gioonna kiaapuuyara yoketaama yaata utiraivoootama Anutuuqaa mmuduuya riraivoootama Mmannasa Yoketaivo ngii aakaiyauvaki varikiae vaa ngia ivaara arinaima rikiaivoootama mmuakiaaya ngii tasi-pama vakiaevee.

**Karaasa Yeena Rau Kioo Kuaivovée  
The New Testament in the Waffa Language of Papua  
New Guinea  
Nupela Testamen long tokples Waffa long Niugini**

copyright © 1975 Wycliffe Bible Translators, Inc.

Language: Waffa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files  
dated 22 Nov 2019

4da5455c-4c87-58ee-a650-bb37acea5bca